

यहोसू

परमेस्वर यहोसू क इस्राएल क अगुअइ करइ बोलावत ह

1 मूसा यहोवा क सेवक रहा। नून क पूत यहोसू मूसा क सहायक रहा। मूसा क मनइ क पाछे यहोवा यहोसू स बातन किहस। यहोवा यहोसू स कहेस, 2“मोर सेवक मूसा मर गावा। अब इ सबइ लोग अउर तू यरदन नदी क पार जा। तू पचन्क उ भुइँया मँ जाइ चाही जेका मइँ इस्राएल क लोगन क यानी तू पचन्क दइ देत अहउँ। 3मइँ मूसा क इ वचन दिहे रहेउँ कि इ भुइँया मइँ तू पचन्क देब। ऐह बरे मइँ तू पचन्क उ हर एक पहुँटा देब, जउन कउने ठउरे पइ भी तू जाब्या।

4“इ भुइँयाँ अउर रेगिस्तानी भुइँया लोबानोन स लइके फरात नदी तलक, हितियन क पूरी भुइँया अउर हिआँ स लइके पच्छिम मँ भूमध्य सागर तलक क भुइँया तोहार इलाके क अन्दर तलक होइ। 5मइँ मूसा क संग रहेउँ अउर मइँ उहइ तरह तोहरे संग रहब। तोहरे पूरी जिन्नगी मँ, तू पचन्क कउनो भी मनई तोस स खिलाफ करइ मँ समरथ नाहीं होइ। मइँ तू पचन्क छोड़ब नाहीं। मइँ कबहु तू पचन्क दूर नाहीं होब।

6“यहोसू, तू पचन्क मजबूत अउ हिम्मती होइ चाही। तोहका, इ मनइयन क अगुआ होइ चाही उ जइसे पचे आपन भुइँया लइ सकइँ। इ उहइ भुइँया बाटइ जेका मइँ ओनका देइ क ओनके पुरखन क वचन दिहे रहेउँ। 7मुला तू पचन्क मजबूत अउ हिम्मती रहइ क होइ। तू पचन्क ओन आदेसन क मानब निहचय क संग करइ चाही, जेनका मोर सेवक मूसा तू पचन्क दिहस ह। दाहिने या बाए कइती मत मुड़ा, तउ तू जउन कछू करब्या ओहमाँ सफल होब्या। 8व्यवस्था क इ किताब हमेसा तोहरे दिमाग मँ होइ चाही। इ किताब क सावधानी स दिन-रात पढ़ब, ताकि तू हर उ कछू जउन एहमाँ लिखा भवा अहइ कइ सकब्या। अगर तू इ करब्या, तउ तू बुद्धिमान बनब्या अउर जउन कछू करब्या ओहमाँ सफल होब्या। 9याद राखा, कि मइँ तोहका मजबूत अउ हिम्मती बना रहइ क हुकुम दिहे रहेउँ। ऐह बरे कबहुँ जिन डेराअ, काहेकि तोहार परमेस्वर यहोवा तोहरे संग सबहिँ जगह रही, जहाँ कहुँ तू जाब्या।”

यहोसू क कार्य निर्वहण

10ऐह बरे यहोसू लोगन क प्रमुखन क आदेस दिहस। उ कहेस 11“डेरा स होइके जा अउर लोगन क तइयार होइ क कहा। लोगन स कहा, ‘कछू खइया क तइयार कइ लेइँ। अबहिँ स तीन दिना पाछे, हम पचे यरदन नदी पार करब। हम पचे जाब अउ उ भुइँया क आपन कब्जा मँ लेब जेका परमेस्वर यहोवा तोहका दइ देत ह।”

12तब यहोसू रूबेन अउ गाद क परिवार समूहन स, अउ मनस्से क आधे परिवार समूह स बतियान। यहोसू कहेस, 13“ओका याद राखा, जउन यहोवा क सेवक मूसा तू सबन स कहे रहा। उ कहे रहा कि परमेस्वर, तोहार यहोवा तू पचन्क आराम अउर सांति क ठउर देइ। उ इ भुइँया क तू पचन्क देइ। तोहार पचन्क पत्नियन, तोहार पचन्क गदेलन अउ तोहार पचन्क जनावरन इ भुइँया मँ रहि सकत हीँ। 14मुला तोहार पचन्क जोधा लोग तोहरे पचन्क भइयन क संग यरदन नदी क जरुर पार करिहीं। तू पचन्क जुद्ध बरे तइयार रहइ चाही अउ आपन भुइँया लेइ मँ आपन भइयन क मदद करइ चाही। 15यहोवा तू पचन्क आराम देइ क एक जगह दिहेस बाटइ, अउर उ तोहरे पचन्क भइयन बरे वइसा ही करी। मुला तू पचन्क आपन भइयन क मदद बरे तब तलक करइ चाही जब तलक उ पचे उ भुइँया क नाहीं लइ लेतेन जेका यहोवा, तोहार परमेस्वर ओनका दइ देत अहइ। तब तू पचे यरदन नदी क पूरब आपन भुइँया मँ लउटि सकत ह। उहइ उ भुइँया अहइ जेका यहोवा क सेवक मूसा तू पचन्क दिहे रहा।”

16तब मनइयन यहोसू क जवाब दिहेन, “जउन भी करइ बरे तू हुकुम देब्या, हम पचे करब। जउने जगह पइ तू पठउब्या, हम पचे जाब! 17हम पचे पूरी तरह मूसा क हुकुम माना ह। उहइ तरह हम पचे सब मानब जउन तू कहब्या। हम पचे यहोवा स सिरिफ एक बात चाहित ह। हम पचे परमेस्वर यहोवा स इहइ माँग करित ह कि उ तोहरे संग वइसा ही रहइ जइसेन ही उ मूसा क संग रहा। 18तब, कउनो व्यक्ति तोहार हुकुम मानइ स इन्कार करत ह या कउनो मनई तोहरे खिलाफ खड़ा होत ह, तब उ मारी डावा जाइ। सिरिफ मजबूत अउ हिम्मती रहा!”

यरीहो मँ गुप्तचर

2 नून क पूत यहोसू अउ सब मनइयन सित्तीम मँ डेरा डाए रहेन। यहोसू दुइ ठु गुप्तचरन क पठएस। कउनो दूसर मनई क पता नाहीं लाग कि यहोसू इ मनइयन क पठए रहा। यहोसू इ मनइयन स कहेए, “जा अउ भुइँया क जाँच कर, यरीहो सहर क होसियारी स लखा।”

ऐह बरे उ पचे यरीहो गएन। उ पचे एक ठु रंडी क घर गएन अउर हुआँ ठहरेन। इ मेहरारू क नाउँ राहाब रहा।

2कउनो यरीहो क राजा स कहेस, “इस्राएल क कछू लोग आजु रात हमरी धरती पइ गुप्तचरी करइ आवा अहइँ।”

3ऐह बरे यरीहो क राजा राहाब क हिआँ इ खबर पउएस: “ओन मनइयन क छिपावा नही जउन आइके तोहार

हिआँ ठहरा अहई। ओनका बाहेर लिआवा। उ पचे मेदलेइ आपन देस में आवा अहई।”

4मेहरारु दुइनउँ मनई क छिपाइ रही। मुला मेहरारु कहेस, “उ पचे दुइनउँ मनई आए तउ रहेन, मुला मई नहीं जानत हउँ कि उ पचे कहाँ स आए रहेन। 5सहर दुआर बन्द होइ क समइ उ पचे मनई साँझ क चला गएन। मई नहीं जानत हउँ कि उ पचे कहाँ गएन। मुला अगर तू हाली जाब्या, तउ साइद तू पचे ओनका धइ लेब्या।” 6(राहाब उ सबइ स कहेस, मुला असिल में मेहरारु ओनका छते पइ पहोंचाइ दिहे रही, अउर ओनका उ चारा में छिपाइ दिहे रही, जेकर ढेर उ ऊपर लगाए रही।)

7एँह बरे इस्राएल क दुइ ठु मनइयन क खोज में राजा क मनई चला गएन। राजा क मनइयन क जरिये सहर छोड़ देइ क तुरन्त पाछे सहर क दुआर बन्द कइ दीन्ह गएन। उ पचे ओन ठउरन पइ गएन जहाँ स लोग यरदन नदी क पार करत रहेन।

8दुइनउँ मनई रात में सोवइ क तइयारी में रहेन। मुला मेहरारु छते पइ गइ अउ उ ओनसे बात किहस। 9राहाब कहेस, “मई जानत हउँ कि इ भुईया यहोवा तोहरे लोगन क दिहेस ह। तु पचे हम लोग क डेरावत अहा। इ देस में रहइवाले सबहि लोगन तू स बहोत डेरान अहई। 10हम पचे डेरान अही काहेकि हम पचे सुनि चुका अही कि यहोवा तू लोगन क मदद कइसे किहस ह। हम सुने अही कि तू पचे मिस्र स बाहेर आवा अहा तउ यहोवा लाल सागर क पानी क सोखाइ दिहस। हम पचे इ भी सुने अही कि तू लोग दुइ ठु एमोरी राजा लोग, सीहोन अउ ओग क संग का किहया। हम पचे सुने अही कि तू लोग यरदन नदी क पूरब में रहइवाले ओन दुइ राजा लोगन क कइसे पूरी तरह स हरा दिहेस। 11हम पचे ओन सबइ घटना क सुने अही अउर बहोत जियादा डेराइ ग अही अउर अब हम में स कउनो मनई ऐतना हिम्मती नहीं कि तू लोगन स लड़ि सकइ। काहेकि तोहार परमेस्सर यहोवा ऊपर सरग अउ तरखाले भुईया पइ हुकुमत करत ह। 12तउ अब, मई चाहत हउँ कि तू पचे मोका वचन द्या। मई तोहार पचन्क मदद किहेउँ ह अउ तू पचन्पइ दया किहेउँ ह। एँह बरे यहोवा क समन्वा वचन द्या कि तू पचे हमरे परिवारे पइ दया करब्या। कृपा कइके मोका कछू निसान द्या कि तू पचे अइसा करब्या। 13मोसे तू पचे इ कहा कि तू पचे मोरे परिवार क जिअत रहइ देब्या जेहमाँ मोरे पिता, भाई, बहिनियन अउर ओनके परिवार होइहीं। तू पचे प्रण करा कि तू पचे हमका मउत स बचउब्या।”

14ओ मनइयन ओका मान लिहन। उ पचे कहेन, “हम तोहरी जिन्नगी बरे अपनी जिन्नगी क बाजी लगाइ देब। कउनो मनई स न बतावा कि हम पचे का करत अही। तब जब यहोवा हम लोगन क हमार देस देइ, तब हम पचे तोहे पइ दया करब। तू हम पचन्पइ बिस्सास कइ सकत ह।”

15उ मेहरारू क घर सहर क देवारे में देवारे क एक ठु हीसा क रूप में बना रहा। एँह बरे उ मेहरारू सहर क देवारे क अन्दर अउर बाहेर क हीसा में रहर रहेन। एँह बरे उ मेहरारू लसुरी क उपयोग कइ क ओनका आपन खिड़की

स नीचे (सहर क बाहेर भुईया प) उतारहेस। 16तब उ मेहरारू ओनसे कहेस, “पच्छिम क पहाड़ियन में जा, जेहसे राजा क सिपाही तू पचन्क एकाएक न घर पकड़ई। हुआँ तीन दिन छुपा रहा। राजा क मनई जब लउटि आवई तब तू पचे आपन रहे पइ जाइ सकत ह।”

17मनइयन ओसे कहेन, “हम पचे तोहका वचन दिहे अही। मुला तोहका एक ठु काम करइ क होइ, नहीं तउ हम पचे आपन वचन बरे जिम्मेदार नहीं होब। 18तू इ लाल लसुरी क उपयोग हम पचन्क बचिके पराइ जाइ बरे करति अहा। हम पचे इहइ ठउर में लउटब। उ समइ तोहका इ लाल लसुरी क आपन खिड़की स जरुर बाँधइ क होइ। तोहका आपन पिता, आपन महतारी, आपन भाई अउर आपन पूरा परिवार क आपन संग इ घरे में रखइ क होइ। 19हम पचे हर एक मनई क सुरिच्छत रखब जउन इ घरे में होइ। अगर तोहरे घरे क भीतर कउनो क चोट पहोंचत ह, तउ ओकरे बरे हम जिम्मेदार होब। अगर तोहरे घरे स कउनो मनई बाहेर जाइ, तउ उ मार डवा जाइ सकत ह। उ मनई बरे हम जिम्मेदार नहीं होब। इ ओकर आपन दोख होइ। 20हम पचे इ वाचा तोहरे संग करत अही। मुला अगर तू कउनो क बतउबिउ कि हम पचे क करत अही, तउ हम पचे आपन इ वचन स अजाद होब।”

21मेहरारू जवाब दिहस, “मई ऐँका अंगीकार करत हउँ।” मेहरारू नमस्कार किहस अउर मनइयन ओकर घर छोड़ दिहन। मेहरारू खिड़की में लाल लसुरी बाँधिस।

22उ पचे ओकरे घरे क तजिके पहाड़ियन में चला गएन जहाँ उ पचे तीन दिन रुकेन। राजा क मनइयन पूरी सड़किया पइ ओनकर खोजबीन किहस। तीन दिन पाछे राजा क मनइयन खोज बन्द कइ दिहन। उ पचे ओनका नहीं हरे पाएन, सो उ पचे सहर में लउटि आएन। 23तब दुइनउँ मनइयन यहोसू क लगे लउटि आएन। मनइयन पहाड़ियन क तजेन अउर नदी पार किहन। उ पचे नून क पूत यहोसू क लगे गएन अउर जउन कछू ओनके संग भए रहेन, उ सबइ यहोसू क बताएन। 24उ पचे यहोसू स कहेन, “यहोवा फुरइ सारा भुईया हम लोगन क दइ दिहस ह। उ देस क सबहि लोग हम पचन्स डेरान अहई।”

यरदन नदी पइ अचरजे क काम

3 दूसर दिन भिन्सारे यहोसू अउ इस्राएल क सबहि लोग उठेन अउ उ पचे सिस्तीम क छोड़ि दिहेन। उ पचे यरदन नदी तलक जात्रा किहन। उ पचे पार करइ स पहिले यरदन नदी पइ डेरा डएन। 2तीन दिन पाछे सेनापति डेरा क बीच स होइके निकरेन। 3उ पचे लोगन क हुकुम दिहेन। उ पचे कहेन, “तू लोग याजक अउ लेवी परिवार समूह क आपन परमेस्सर यहोवा क करार क सन्दूख लइ जात भए लखब्या। उ समइ तू पचे जहाँ हवा, ओका तजि देब्या अउ ओनके पाछे चलब्या। 4मुला ओनके बहोत निअरे जिन रहा। लगभग एक हजार गज दूर ओनके पाछे रहा। तू पचे यह सासता क जात्रा कबहुँ नहीं किहया ह। एँह बरे अगर तू पचे ओनके पाछे चलब्या, तउ तू पचे जान लेब्या कि तू पचन्क कहाँ जाइ क अहइ।”

5तब यहोसू लोगन स कहेस, “आपन क पवितर करा, काहेकि काल्ह भियान यहोवा तू लोगन क बीच में चमत्कार देखाइ।”

6तब यहोसू याजकन स कहेस, “करार क सन्दूख क उठावा अउर लोगन क समन्वा स नदी क पार चला।” एँह बरे याजक लोग सन्दूख क उठाएन अउर ओका लोगन क समन्वा लइ गएन।

7तब यहोवा यहोसू स कहेस, “आजु मई इस्त्राएल क लोगन क निगाह में तू पचन्क महान मनई बनाउब सुरु करब। तब लोग जनिहीं कि मई तोहरे सबन क संग वइसेन ही अहउँ जइसेन में मूसा क संग रहेउँ। 8याजक लोग करार क सन्दूख लइ चलिहीं। याजक लोगन स इ कहा, ‘यरदन नदी क किनारे तलक जा अउर यरदन नदी में रुकि जा।’”

9तब यहोसू इस्त्राएल क लोगन स कहेस, “आवा अउर आपन परमेस्सर यहोवा क हुकुम सुना। 10इ इ बात क प्रमाण अहइ कि यहोवा तू लोगन क संग अहइ अउर उ तोहरे पचन क सत्रु कनान क लोगन हित्तिथन, हिब्वियन, परिज्जियन, गिर्गासियन, एमोरी लोगन अउर यबूसी लोगन क हराइ अउर ओनका उ देस तजइ क विवस करी। 11प्रमाण हिआँ अहइ। सारा संसार क सुआमी क करार क सन्दूख उ समइ तोहरे पचन्क अगवा चली जब तू पचे यरदन नदी पार करब्या। 12आपन बीच स बारह मनइयन क चुना। इस्त्राएल क बारह परिवार समूहन में स हर एक स एक मनई चुना। 13याजक लोग समूचे संसार क सुआमी, यहोवा क करार क सन्दूख क लइके चलिहीं। उ पचे उ सन्दूख क तोहरे समन्वा यरदन नदी में लइ जइहीं। जब उ पचे पानी में घुसिहीं, तउ यरदन क पानी क बहब रुकि जाइ। पानी रुकि जाइ अउर उ जगह क पाछे ढेर में ठाड़ होइ जाइ।”

14याजक मनइयन क समन्वा करार क सन्दूख लइके चलेन अउर मनइयन यरदन नदी पार करइ बरे डेरा क तजि दिहन। 15(फसिल कटइ क समइ यरदन नदी आपन किनारन स ऊपर बहत ह। एँह बरे नदी पूरी तरह भरी भई रही।) सन्दूख लइ चलइवालन याजक लोग नदी क किनारे पहोचैन। उ पचे पानी में गोड़ धरेन। 16अउर फौरन उहइ समइ पानी क बहब बन्द होइ गवा। पानी नदी क ऊपर ढेर में खड़ा होइ गवा। पानी नदी क चढ़व कइँती लम्बी दूरी तलक लगातार आदम तलक (सारतान क निअरे एक ठु सहर) ठाड़ होत चला गवा। मनइयन यरीहो क लगे नदी क पार किहन। 17याजक लोग यहोवा क करार क सन्दूखे क नदी क बीच लइ जाइके खड़ा होइ गएन अउर हुवाँ भुईँया झुरान होइ गएन जब तलक इस्त्राएल क लोग यरदन नदी क झुरान भुईँया स होत भए चलिके पार नाहीं करइ लइ, तब तलक याजक हुआँ ओनका जोहत रहेन।

मनइयन क सुमिरन करावइ बरे सिलन

4 जब सबहिँ लोग यरदन नदी क पार कइ लिहन तब यहोवा यहोसू स कहेस। 2मनइयन में स बारह ठु मनई चुना। हर एक ठु परिवार समूह स एक ठु मनई चुना।

3मनइयन क हुकुम द्या कि उ पचे हुआँ नदी क बीच में स सिलन क बटोरा जहाँ याजक लोग खड़ा अहइ। ओन बारह सिलन क आपन संग लइ जा। ओन बारह सिलन क उ जगह पइ धरा जहाँ तू पचे आजु रात ठहरा।”

4एँह बरे यहोसू हर एक परिवार समूह स एक ठु मनई चुनेस तब उ बारह मनइयन क एक संग बोलाएस। 5यहोसू ओनसे कहेस, “नदी में हुआँ तलक जा जहाँ पवितर सन्दूख अहइ जेहमाँ तोहार परमेस्सर यहोवा क वाचा अहइ। तू पचन में स हर एक क एक सिला क खोज करइ चाही। इस्त्राएल क बारह परिवार समूहन में स हर एक बरे एक ठु सिला होइ। उ सिला क आपन काँधि पर ढोवा। 6इ सबइ सिलन याद रखइ बरे तोहरे पचन्क बीच चीन्हा होइहीं। भविस्स में तोहर पचन्क गदेलन इ पुछिहीं, ‘इ सबइ सिलन क का महत्व अहइ?’ 7गदेलन स कहा कि यहोवा यरदन नदी में पानी क बहब बन्द कइ दिहे रहा। जब यहोवा क करार क सन्दूख नदी क पार किहस तब पानी क बहब बन्द होइ ग रहा। इ सिलन इस्त्राएल क लोगन बरे इ घटना सदा ही यादगारी होब्या।”

8एँह बरे इस्त्राएल क मनइयन यहोसू क हुकुम मानेन। उ पचे यरदन नदी क बीच स बारह सिलन लइ गएन। इस्त्राएल क बारह परिवार समूहन में स हर एक बरे एक ठु सिला रही। उ पचे उ वइसेन ही किहन जइसा यहोवा यहोसू क आदेस दिहे रहा। उ पचे मनई सिलन क आपन संग लइ गएन। तब उ पचे ओन सिलन क हुआँ रखेन जहाँ उ पचे आपन डेरा डाएन। 9(यहोसू क भी यहोवा क पवितर सन्दूखे क ढोवइवाला याजकन जहाँ खड़ा रहेन, हुआँई यरदन नदी क बीच में बारह सिलन रखइ क रहेन। उ सबइ सिलन आजु भी उ जगह पइ अहइँ।)

10यहोवा यहोसू क आदेस दिहे रहा कि उ लोगन स कहइ कि ओनका का करइ चाही। उ सबइ उहइ बातन रहिन, जेनका जरुर करइ बरे मूसा यहोसू स कहे रहा। एँह बरे पवितर सन्दूख क ढोवइवाला याजकन नदी क बीच में तब तलक खड़ा ही रहेन, जब तलक इ सबइ सबहिँ काम पूरा नाहीं होइ गएन। मनइयन हाली किहन अउ नदी पार कइ गएन। 11जब लोग नदी क पार कइ लिहेन, तब याजक यहोवा क सन्दूख लइके मनइयन क समन्वा आएन।

12रूबेन अउर गादी क परिवार समूह, अउ मनस्से क आधा परिवार समूह, मूसा ओनका जउन करइ क कहे रहा, किहस। इ मनइयन दूसर लोगन क समन्वा नदी क पार किहेन। इ सबइ लोग जुद्ध बरे तइयार रहेन। इ सबइ लोग इस्त्राएल क दूसर लोगन क उ देस क लेइ में मदद करइ जात रहेन, जेका यहोवा ओनका देइ क वचन दिहे रहा। 13लगभग चालीस हजार फउजी, जउन जुद्ध बरे तइयार रहेन, यहोवा क समन्वा स गुजरेन। उ पचे यरीहो क मइदान कइँती बढ़त रहेन।

14उ दिन यहोवा इस्त्राएल क सबहिँ लोगन क निगाह में यहोसू क एक महान मनई बनाइ दिहस। उ समइ स अगवा लोग यहोसू क सम्मान करइ लागेन। उ पचे यहोसू क सम्मान जिन्नगी भइ वइसेन ही करइ लागेन जइसेन मूसा क करत रहेन।

15जउने समइ सन्दूख लइ ढोवइवाला याजकन अबहिं नदी में खड़ा ही रहेन, यहोवा यहोसू स कहेस। 16“याजकन क नदी स बाहेर आवइ क हुकुम द्या।”

17एँह बरे यहोसू याजक लोगन क आदेस दिहस। उ कहेस, “यरदन नदी क बाहेर आवा।”

18याजक लोग यहोसू क आग्या मानेन। उ पचे सन्दूखे क लइके नदी स बाहेर आएन। जब याजक लोगन क गोड़ नदी क दूसरे कइँती भुइँया क छुएन, तब नदी क पानी फुन बहइ लाग। पानी फुन किनारन क ऊपर स वसाइ बहत लाग जइसे इ सबइ लोगन क नदी पार करइ क पहिले रहा।

19मनइयन यरदन नदी क पहिले महीना क दसाँ दिन पार किहन। मनइयन यरीहो क पूरब गीलगाल में डेरा डाएन। 20मनइयन ओन बारह सिलन क आपन संग लइ चलत रहेन जेनका उ पचे यरदन नदी स निकारे रहेन अउर यहोसू ओन सिलन क गीलगाल में कायम किहे रहा। 21तब यहोसू लोगन स कहेस “भविस्स मैं तोहार गदेलन आपन महतारी अउर बाप स पूछिहीं, ‘इ सबइ सिलन क का महत्व अहइ?’ 22तू पचे गदेलन क बतउब्या, ‘इ सबइ सिलन हम लोगन क इ सुमिरन करावइ मैं मदद करत हीं कि इस्राएल क लोग कउने तरह झुरान भुइँया पइ स यरदन नदी क पार किहन। 23तोहार परमेस्सर यहोवा नदी क पानी बहब रोक दिहस। नदी तब तलक झुरान रही जब तल इस्राएल क लोग नदी क पार नहीं कइ किहन। यहोवा यरदन नदी पइ लोगन बरे उहइ किहस, जउन उ पचे लोगन बरे लाल सागर पइ किहे रहेन। याद करा कि यहोवा लाल सागर पइ पानी क बहब एँह बरे रोके रहा कि लोग ओका पार कइ सकइँ।’ 24यहोवा इ एँह बरे किहस कि इ देस क सबहिं लोग जान लेइँ कि तोहार परमेस्सर यहोवा महान सक्ती धरत ह जेहसे लोग सदा ही यहोवा तोहरे परमेस्सर स डेरात रहइँ।”

5 इ तरह, यहोवा यरदन नदी क तब तलक झुरान राखेस जब तलक इस्राएल क लोग ओका पार नहीं कइ लिहन। यरदन नदी क पच्छिम में बसइयन एमोरी राजा लोग अउर भूमध्य सागर क किनारे पइ बसइयन कनानी राजा लोग एकरे बारे में सुनेन अउर उ पचे बहोत जियादा डेराइ ग रहेन। ओकरे पाछे उ पचे मैं इस्राएल क लोगन क विरुद्ध जुद्ध करइ क हिम्मत नहीं रहि गएन।

इस्राएलियन क खतना

2उ समइ, यहोवा यहोसू स कहेस, “चकमक पाथर क छूरी बनावा अउर इस्राएल क लोगन क खतना फुन करा।”

3एँह बरे यहोसू चकमक पाथर क छूरी बनाएस। तब उ इस्राएल क लोगन क खतना क रीति गिबआत हाअरलोत में पूरा किहस।

4-7इहइ कारण अहइ कि यहोसू ओन सबहिं मनइयन क खतना किहस, जउन इस्राएल क लोगन क जरिये मिस्त्र छोड़ देइ क पाछे फउज मैं रहइ क उम्र क होइ ग रहेन। रेगिस्तान मैं रहइ क समझ ओन फउजियन मैं स कई लोगन यहोवा क बात नहीं मानेन। एँह बरे यहोवा ओन

मनइयन क अभिसाप दिहे रहा कि उ पचे “दूध अउ सहद क नदियन वाले भुइँया” क नहीं लखि पाइँही। यहोवा हमरे पुरखन क उ भुइँया देइ क वचन दिहे रहा, मुला इ सबइ मनइयन क कारण लोगन क चालीस बरिस तलक रेगिस्ताने मैं भटकइ क पड़ा अउर इ तरह उ सबइ फउजी मरि गएन अउर ओनकर जगहिया ओनकइ बेटवन लइ लिहन। मुला मिस्त्र स होइवाली जात्रा मैं जेतने गदेलन रेगिस्ताने मैं पइदा भ रहेन, ओनमों स कउनो क खतना नहीं होइ सका। एँह बरे यहोसू ओनकइ खतना किहस।

8यहोसू सबहिं मनइयन क खतना पूरा किहस। उ पचे तब तलक डेरा मैं रहेन, जब तलक तन्दुरुस्त नहीं भएन।

कनान में पहला फसह पर्व

9उ समइ यहोवा यहोसू स कहेस, “जब तू मिस्त्र मैं गुलाम रह्या तब तोहका गुलामी क लज्जा रह्या। मुला आजु मइँ तोहार लज्जा दूर किहेउँ ह।” एँह बरे यहोसू उ जगह क नाउँ गिलगाल धरेस अउर उ जगह आजु भी गिलगाल कही जात ह।

10जउने समइ इस्राएल क लोग यरीहो क मइदान में, गिलगाल क जगह डेरा डाए रहेन, उ पचे फसह पर्व मनावत रहेन। इ महीना क चउदहवाँ दिन क साँझ क रहा। 11फसह पर्व क पाछे, अगला दिन मनइयन अनाज क उ खइया क खाएन जउन भुइँया पइ उगि रहा। उ पचे बेखमीरे क रोटी अउर भूँजा अनाज खाएन। 12उ दिना जब मनइयन भोजन कइ लिहन, ओकरे पाछे सरग स खास भोजन क आउब बन्द होइ ग। ओकरे पाछे, इस्राएल क लोग सरग स बिसेख भोजन नहीं पाएन। ओकरे पाछे उ पचे उहइ भोजन खाएन जउन कनान मैं पइदा होइ रहा।

13जब यहोसू यरीहो क निअरे रहा तब उ ऊपर आँखी उठाएस अउर उ आपन समन्वा एक तु मनई क लखेस। उ मनई क हाथे मैं एक तु तरवार रही। यहोसू उ मनई क लगे गवा अउ ओहसे पूछेस, “का तू हमरे मीतन मैं स कउनो एक अहा या हमार दुस्मनन मैं स?”

14उ मनई जवाब दिहस, “मइँ दुस्मन नहीं हउँ। मइँ यहोवा क फउज क सेनापति अहउँ। मइँ अबहुँ-अबहुँ तोहरे लगे आवा हउँ।”

तब यहोसू आपन मूँड़ भुइँया तलक आपन सम्मान परगट करइ बरे निहुराएन। उ पूछेस, “का मोरे सुआमी क मोर बरे कउनो हुकुम अहइ? मइँ तोहार सेवक अहउँ।”

15यहोवा क फउज क सेनापति जवाब दिहस, “आपन पनही उतारा। जउन जगह पइ तू खड़ा अहा उ ठउर पवित्त अहइ।” एँह बरे यहोसू ओकर हुकुम मानेस।

यरीहो पइ कब्जा

6 यरीहो सहर क दुआर बन्द रहेन। उ सहर क लोग डेरान रहेन काहेकि इस्राएल क लोग निअरे रहेन। कउनो सहर मैं नहीं जात रहा अउर कउनो सहर स बाहेर नहीं आवत रहा।

2तब यहोसू यहोवा स कहा, “लखा, मइँ यरीहो सहर क तोहरे अधिकार मैं दइ दिहेउँ ह। एँकर राजा अउर एकर सारे

सिपाही तोहरे मातहत अहईं। 3छः दिना तलक हर एक दिन आपन फउज क संग सहर क चारिहुँ कइँती गस्त करा। 4भेड़ क सींगन क तुरहियन क लइके सात याजकन क चलइ द्या। याजकन स कहा कि उ पचे पवितर सन्दूखन क समन्वा चलइँ। सतएँ दिन सहर क चारिहुँ कइँती सात फेरा करा। सतएँ दिन याजक लोगन स कहा कि उ पचे चलइ क समइ तुरही बजावईं। 5याजक लोग तुरहियन स खूब जोर क अवाज करिहीं। जब तू उ अवाज सुना तउ तू सब लोगन स चिचियाब सुरु करइ कहा। जब तू अइसा करब्या तउ सहर क देवारन भहराइ जइहीं। तब तोहार लोग सीधा सहर में जइहीं।”

6इ तरह नून क पूत यहोसू याजकन क बटोरेस। यहोसू ओनसे कहेस, “यहोवा क पवितर सन्दूख क लइ चला। सात याजकन क भी तुरही लइ चलइ बरे ल्या। ओन याजकन क सन्दूखे क समन्वा चलइ चाही।”

7तब यहोसू लोगन क हुकुम दिहस, “जा अउर सहर क चारिहुँ कइँती ताकत क परिक्रमा करा। अस्त्र-सस्त्र वाले फउजी यहोवा क पवितर सन्दूखे क अगवा चलइँ।”

8जब यहोसू लोगन स बोलब पूरा किहस तउ यहोवा क समन्वा सात याजक लोग चलब सुरु किहेन। उ पचे तुरहियन लिए भए रहेन। चलत समइ उ पचे तुरहियन बजावत रहेन। यहोवा क सन्दूख क लइके चलइवालन याजक लोग ओनके पाछे चलन रहेन। 9अस्त्र-सस्त्र धारण करइवाले फउजी याजक लोगन क अगवा चलत रहेन। याजक तुरही बजावत रहेन। बचा भवा मनई तुरही बजावत भए पवितर सन्दूख क पाछे चलत रहेन। 10मुला यहोसू ओनका आवाज न लगइ बरे हुकुम दिहस। उ कहेस, “जिन बोला अउ नाही आवाज करा जब तलक कि मई हुकुम न दइ। मोरे कहइ क समइ तू पचे ललकार सकत ह।”

11एँह बरे यहोसू याजक लोगन क यहोवा क पवितर सन्दूख क संग सहर क चारिहुँ कइँती लइ चलइ क हुकुम दिहस। तब उ पचे आपन डेरा में लउटि गएन अउर रात भइ हुवँइ ठहरेन।

12दूसर दिन, भिन्सारे यहोसू उठा। याजक फिन यहोवा क पवितर सन्दूख क लइके चलेन। 13अउर सातउँ याजक लोग सात तुरही लइके यहोवा क पवितर सन्दूख क समन्वा बजावत भएन चलेन। उ पचे कदम स कदम मिलावत रहेन। ओनके समन्वा अस्त्र-सस्त्र धारणकरइवालन फउजी चलत रहेन। अस्त्र-सस्त्र धारणकरइवालन फउजी जउन याजक लोग तुरहियन बचावत रहेन क संग यहोवा क सन्दूख क पाछे चलत रहेन। 14एँह बरे दूसर दिन, ओन सबइ लोग एक दाई सहर क चारिहुँ कइँती चक्कर लगाएन अउर तब उ पचे आपन डेरन में लउटि गएन। उ पचे लगातार छः दिन तलक इ किहन।

15सतएँ दिन उ पचे भोर में उठेन अउर उ पचे सहर क चारिहुँ कइँती सात चक्कर लगाएन। उ पचे उहइ तरह सहर क चक्कर लगाएन जउने तरह उ पचे ओकरे पहिले लगाइ चुका रहेन, मुला उ दिन उ पचे सात चक्कर लगाएन। 16जब उ पचे सतईँ दाई सहर क चक्कर लगाएन तउ याजक लोग आपन तुरही बजाएन। उ समइ यहोसू आदेस

दिहस, “अब तू जोर स आवाज लगा। यहोवा इ नगर तू पचन्क देत अहइ। 17सहर अउ एहमाँ क हर एक चीज यहोवा क अहइ।* सिरिफ पतुरिया राहाब अउ ओकरे घरे में रहइवाले लोग ही जिअत रइहीं। इ सबइ मारा नाही जाइ चाही काहेकि राहाब ओन दुइनउँ गुप्तचरन क मदद किहे रही। 18इहउ सुमिरा कि हम क ँकरे अलावा दूसर चिजियन्क बरबाद करइ क अहइ। ओन चिजियन्क जिन ल्या। अगर तू पचे ओन चिजियन्क लेत अहा अउर आपन डेरन में लिआवत अहा तउ तू पचे खुद बरबाद होइजाब्या अउर तू पचे आपन सबहिँ इस्त्राएली लोगन पइ भी मुसीबत लिअउब्या 19सबहिँ चाँदी, सोना अउर लोहा क बनी चिजियन यहोवा क अहईं। इ सबइ चिजियन यहोवा क खजाने में ही धरी जाइ चाही।”

20याजक लोग तुरही बजाएन। मनइयन तुरहियन क अवाज सुनेन अउर आवाज लगवत सुरु किहेन। देवारन भहरानिन अउर लोग सीधे सहर में धावइ लागेन। इ तरह इस्त्राएल क लोग सहर क हराएन। 21मनइयन सहर क हर एक चीज बरबाद किहेन। उ पचे हुआँ क हर एक जिअत परानी क बरबाद किहेन। उ पचे नउजवान, बुढवन, जवान मेहररुअन, बुढियन, भेड़िन अउर गदहन क मार डएन।

22यहोसू दुइनउँ गुप्तचरन स बतियान। उ कहेस, “पतुरिया क घरे जा। ओका बाहेर लइ आवा। सबइ मनइयन क बाहेर लइ आवा अउर ओन लोगन क भी बाहेर लइ आवा जउन ओकरे संग अहईं। इ तू पचे एँह बरे करा कि तू पचे ओका वचन दिहे अहा।”

23दुइनउँ मनई घर में गएन अउर राहाब क बाहेर लिआएन। उ पचे ओकर पिता, महतारी, भाइयन अउ ओकर समूचइ परिवार अउ ओकरे साथे क दूसर सबहिँ क बाहेर निकारेन। उ पचे इस्त्राएल क डेरा क बाहेर इ सबहिँ लोगन क सुरच्छित रखेन।

24तब इस्त्राएल क लोग सारा सहर जराए दिहन। उ पचे सोना, चाँदी, काँसा, अउर लोहा स बनी चिजियन क अलावा सबहिँ चिजियन क जराए दिहन। इ सबइ चिजियन यहोवा क खजाने बरे बचाइ लीन्ह गइन। 25यहोसू राहाब, ओकर परिवार अउ ओकरे रिस्तेदारन क बचाइ लिहस। यहोसू ओनका जिअत रहइ दिहस काहेकि राहाब ओन लोगन क मदद किहे रही, जेनका उ यरीहो में जासूसी करइ बरे पठए रहा। राहाब आज भी इस्त्राएल क लोगन में आपन सन्ताने क रूप में रहति ह।

26उ समइ, यहोसू किरिया खाएस। उ कहेस:

“कउनो मनई जउन यरीहो सहर क फिन निर्माण क जतन करी यहोवा कइँती स अभिसापित होब्या। जउन मनई सहर क नीव रखी, आपन पहिलउटी बटवा क खोइ। जउन मनई फाटक लगाइ उ आपन सबन त लहुरा बटवा क खोई।”

27एह बरे यहोवा, यहोसू क संग रहा अउर इ तरह यहोसू पूरे भुईया में प्रसिद्ध होइ गवा।

हर एक चीज यहोवा क अहइ ँकर अक्सर इ अरथ होत रहा कि सबइ चीजन मन्दिर क कोसागार में जमा होत रहिन या बरबाद कइ दिन्ह जात रहिन ताकि दूसर लोग ओनकर प्रयोग न कइ सकईं।

आकान क पाप

7 मुला इस्राएल क लोग परमेस्सर क आग्या नाहीं मानेन। यहूदा परिवार समूह क एक मनई आकान कर्मी क पूत जउन जब्दी क पूत रहा। आपन संग कछू वर्जित चिजियन धइ लिहिस जेनका बरबाद करइ क रहा। एँह बरे यहोवा इस्राएल क लोगन पइ कोहाइ गवा। जब उ पचे यरीहो क हराइ चुकेन तब यहोसू कछू लोगन क पठाएस। ऐ, बेतेल क पूरब बेतावेन क लगे रहा। यहोसू ओनसे कहेस, “ऐ जा अउर उ छेत्र क कमजोरियन क लखा।” एँह बरे लोग उ देस में जासूसी करइ गएन।

3पाछे उ मनईयन यहोसू क लगे लउटिके आएन। उ पचे कहेन, “ऐ कमजोर छेत्र अहइ। हम लोगन क ओनका हरावइ बरे आपन सबहि लोगन क जरूरत नाहीं पड़ी। हुओं लइइ बरे दुइ हजार या तीन हजार मनइयन क पठवा। आपन सबहि फउजन क हुओं उपयोग करइ क जरूरत नाहीं अहइ। हुओं पइ थोड़ा मनई हम लोगन क खलाफ लइइवाला अहइ।”

4-5एँह बरे लगभग तीन हजार मनईयन ऐ क खिलाफ गएन। मुला ऐ क लोग लगभग छत्तीस इस्राएल क मनइयन क जंग में मार गिराएन अउ बचा भवा इस्राएल क लोग पराइ गएन। ऐ क लोग सहर-दुआर स लगातार पाथर क खदानन तलक पाछा किहन। इ तरह ऐ क लोग ओनका ढलवान पइ बुरी तरह हराएन।

जब इस्राएल क लोग इ लखेन तउ उ पचे बहोत डेराइ गएन अउर आपन हिम्मत हार गएन। 6जबहिं यहोसू एकरे बारे में सुनेस तउ उ आपन ओढ़ना फाड़ि डाएस। उ पवितर सन्दूखे क समन्वा भुईया पइ ओलरा। यहोसू हुओं साँझ तलक पड़ा रहा। इस्राएल क नेता लोग इहइ किहन। उ पचे आपन मूँडि पइ धूरि डाएन।

7तब यहोसू कहेस, “यहोवा, मोर सुआमी। तू हमरे लोगन क यरदन नदी क पार लिआया। मुला तू हमका ऐतनी दूर काहे लिआया, का सिरिफ एमोरी लोगन क जरिये स हम लोगन क बरबाद करइ बरे लिआया? हम लोग यरदन नदी क दूसरे किनारे पइ ठहरा होइत अउर सन्तुट्ट रहित। 8मोरे मालिक, मई आपन जिन्नगी क कसम खाइके कहत हउँ कि मई तोहस का कहइ सकत हउँ। इस्राएल आपन दुस्मनन क पास स भाग गहेस ह। 9कनानी अउ इ देस क सबहि लोग इ सुनिहीं जउन भवा, तब उ पचे हम लोगन क खिलाफ अइहीं अउर हम सबन क मारि डइहीं। तब इ तू आपन महान नाउँ क रच्छा बरे का करब्या?”

10यहोवा यहोसू स कहेस, “खड़ा होइ जा। तू आपन मुँह क बल काहे गिरा अहा? 11इस्राएल क लोग मोरे खिलाफ पाप किहन। उ पचे मोरी उ करार क तोड़ें, जेका मई ओनका संग किहेस रहेउँ। उ पचे उ चिजियन में स कछू चिजियन लिहन जेनका बरबाद करइ क हुकुम मई दिहेउँ ह। उ पचे मोर चोरी किहेन ह। उ पचे लबार बात कहेन ह। उ पचे उ सबइ चिजियन आपन लगे धरेन ह। 12इहइ कारण अहइ कि इस्राएल क फउज आपन दुस्मनन क नाहीं हराइ सकेस। उ पचे पलटेन अउर आपन दुस्मनन स पराइ गएन काहेकि कउनो मनई ओन चिजियन क लिहेन जेका बरबाद

करइ चाहत रहा। मई तब तलक तोहार मदद नाहीं करब जब तलक तू उ चिजियन क बरबाद नाहीं करब्या जेका मई तू पचन्क क बरबाद कइ करइ क हुकुम दिहे रहा।

13“अब तू जा अउर लोगन क पवितर करा। लोगन स कहा, ‘उ पचे आपन क पवितर करइ। भियान बरे तइयार होइ जा। इस्राएल क परमेस्सर यहोवा कहत ह कि कछू लोग उ सबइ चिजियन आपन लगे धरे अहइ, जेनका मई बरबाद करइ क हुकुम दिहे रहेउँ। तू तब तलक आपन दुस्मनन क हरावइ क जोगगा नाहीं होब्या, जब तलक तू ओन चिजियन क खतम नाहीं कइ देब्या।

14“भियान भिन्सारे तू सबन्क यहोवा क समन्वा खड़ा होइ क होइ। सबहि परिवार समूह यहोवा क समन्वा पेस होइहीं। दूसर परिवार समूह में स यहोवा एक परिवार समूह क चुनी। तब सिरिफ उहइ परिवार समूह यहोवा क समन्वा खड़ा होइ। तब बस उहइ परिवार समूह स यहोव एक कबीला क चुनी। तब सिरिफ उहइ कबीला यहोवा क समन्वा खड़ा होइ। तब यहोवा उ कबीला क प्रत्येक परिवार क परखी अउर उ में स एक क चुनी। तब उ परिवार अकेले यहोवा क समन्वा खड़ा होइ जउन कि उ परिवार स एक एक क चुनी। 15उ मनई जउन इ चिजियन क संग पावा जाइ जेनका मई बरबाद करइ क हुकुम दिहे रहेउँ, धइ लीन्ह जाइ। तब उ मनई क अउर ओकरे संग ओकर हर एक चीज आगी में झोंकिके जरि दीन्ह जाइ। उ मनई यहोवा क करार क तोड़ेंस ह। उ इस्राएल क लोगन क बीच में बहोत ही सरमनाक काम किहेस ह।”

16दूसरे भिन्सारे यहोसू इस्राएल क सबहि लोगन क यहोवा क समन्वा लइ गवा। सारा परिवार समूह यहोवा क समन्वा खड़ा होइ गवा। यहोवा यहूदा परिवार-समूह क चुनेस। 17तब यहूदा क सारा परिवार समूह यहोवा क समन्वा खड़ा भएन। यहोवा ओन में स जेरह कबीला क चुनेस। तब जेरह कबीला क सबहि परिवार यहोवा क समन्वा खड़ा भएन। ऐनमें स जब्दी क परिवार चुना गवा। 18तब यहोसू इ परिवार क सबहि मनसेधुअन क यहोवा क समन्वा आवइ क कहेस। यहोवा कर्मी क पूत आकान क चुनेस। (कर्मी जब्दी क पूत अउर जब्दी जेरह क पूत रहेन।)

19तब यहोसू आकान स कहेस, “पूत, तोहका आपन पराथना कहइ चाही। इस्राएल क यहोवा परमेस्सर क सम्मान करइ चाही अउर ओहसे तोहका पापन्क कबूलइ चाही। मोका बतावा कि तू क किह्या? मोहसे कछू छुपावइ क कोसिस जिन करा।”

20आकान जवाब दिहस, “इ फुरइ अहइ! मई इस्राएल क यहोवा परमेस्सर क खिलाफ पाप किहेउँ ह। मई जउन किहे हउँ उ इ अहइ:

21“हम लोग यरीहो सहर क एँकर सबहि चिजियन क संग आपन कब्जे में लीन्ह। ओन चिजियन में मई सिनार क एक सुन्नर आढ़ना अउर लगभग पाँच पौण्ड चाँदी अउर एक पौण्ड सोना लखा। मोर ऐन चिजियन क अपने बरे धरइ क बहोतइ इच्छा रही। एँह बरे मई ओनका लइ लिहेउँ। तू ओन चिजियन क मोरे तम्बू क खाले जमीन में गड़ा भवा पउब्या। चाँदी ओढ़ना क खाले अहइ।”

22एँह बरे यहोसू कछू मनइयन क तम्बू में पठएस। उ पचे धावत धावत पहोंचेन अउर ओन चिजियन क तम्बू में छुपा पाएन। चाँदी ओढ़ना क नीचे रही। 23उ पचे ओन चिजियन क तम्बू स बाहेर लिआएन। उ पचे ओन चिजियन क यहोसू अउ इस्त्राएल क सबहिं लोगन क लगे लइ गएन। उ पचे ओका यहोवा क समन्वा जमीने पइ लिआइके पटक दिहेन।

24तब यहोसू अउर सबहिं लोग जेरह क पूत आकान क घाटी में लइ गएन। उ पचे चाँदी, ओढ़ना, सोना, आकान क बिटियन-बेटवन, ओकर गोरुअन, ओकर गदहन, भेड़िन, तम्बू अउर सबहिं चिजियन क भी लिहना। एँन सबहिं चिजियन क उ पचे आकान क संग आकोर क घाटी में लइ गएन। 25तब यहोसू कहेस, “तू हमरे बरे इ सबइ मुसीबतन काहे किह्या? अब यहोवा तोह पइ मुसीबत लिआइ।” तब सबहिं लोगन आकान अउर ओकर परिवार पइ तब तलक पाथर लोकाएन जब तलक उ पचे मरि नहीं गएन। उ पचे ओकरे परिवार क मार डाएन। तब मनइयन ओनका अउ ओकर सबहिं चिजियन क बारि दिहेन। 26आकान क बारि देइ क पाछे ओकरे तने पइ उ पचे कईउ सिलन क धरेन। इ सबइ सिलन आजु भी हुआँ अहइँ। इ तरह यहोवा आकान पइ विपद दाएस। इहइ कारण अहइ कि ठउर ओकोर घाटी कही जात ह। एँकरे पाछे, यहोवा लोगन स नाखुस नहीं रहा।

ऐ बरबाद भवा

8 तब यहोवा यहोसू स कहेस, “डेराअ जिन। हिम्मत न छोड़ा आपन सबहिं सिपाहियन क ऐ लइ जा। मईँ ऐ क राजा क हरावइ में तोहार मदद करब। मईँ ओकर नागरिक क, ओकरे सहर क अउर ओकर भुइँया क तोहका दइ देत अहँउ। 2तू ऐ अउर ओकरे राजा क संग उहइ करब्या, जउन तू यरीहो अउ ओकरे राजा क संग किह्या ह। इ दईँ तू सिरिफ इ सहर क सारी सम्पत्ति अउ पसु-धन लेब्या अउर आपन लगे धरब्या अउर आपन लगे धरब्या। फुन तू आपन लोगन क बीच में ओकर बँटवारा करब्या। अब तू आपन कछू सिपाहियन क सहर क पाछे छुपइ क हुकुम देब्या।”

3एँह बरे यहोसू आपन पूरी फउज ऐ कईँती लइ गवा। तब यहोसू तीस हजार ताकतवर लराकन आपन फउज में स चुनेस। उ एँनका राति क बाहेर पठइ दिहस। 4यहोसू ओनका इ हुकुम दिहस: “मईँ जउन कहत हउँ, ओका होसियारी स सुना। तू पचन्क सहर क पाछे क धेत्र में छुपा रहइ चाही। हमला क समइ क बाट जोहा। सहर स बहोत दूर जिन जा। होसियारी स लखत रहा अउ तइयार रहा। 5मईँ फउजियन क आपन संग सहर कईँती हमला बरे लइ जाबउँ। हम लोगन क खिलाफ लइइ बरे सहर क लोग बाहेर अइहीं। हम लोग मुड़ि जाब अउर पहिले क तरह पराइ जाब। 6उ पचे हम लोगन क तब तलक पाछा करिहीं जब तलक हम लोग ओनका सहर स दूर न लइ जाब। काहेकि उ पचे इ आपन आप में सोचिहीं कि उ पचे हम पचन स पहिले क तरह परात अही। एँह बरे हम लोग ओन लोगन स पराइ जाब। 7तब तू पचे आपन लुकाइ क जगहिया स अउब्या अउ सहर

पइ कब्जा कइ लेब्या। तोहार परमेस्सर यहोवा तू पचन्क जीत जाइ क सक्ती देइ।

8“एँह बरे तू पचे जब सहर पइ कब्जा कइ लया तब ओका बारि द्या। जइसा कि यहोवा तू पचे स कहेस ह। लखा मईँ तू पचन्क इ करइ क हुकुम देत अहउँ।”

9तब यहोसू ओन सिपाहियन क ओनके लुकाइ क जगहिया पइ पठइ दिहस अउ जोहइ लाग। उ पचे बेतेल अउर ऐ क बीच क जगह गएन। इ जगह ऐ क पच्छिम में रही। मुला यहोसू आपन लोगन क संग रात भइ हुआँई रुका रहा।

10अगले भिन्सारे यहोसू लोगन क बटोरेस। तब यहोसू अउर इस्त्राएल क बुजुर्गन सिपाहियन क ऐ लइ गएन। 11यहोसू क सबहिं सिपाहियन ऐ पइ हमला किहना। उ पचे सहर क दुआर क समन्वा रुकेन। फउज आपन डेरा सहर क उलर दिसा में डाएस। फउज अउर ऐ क बीच में एक तु घाटी रही।

12यहोसू लगभग पाँच हजार फउजियन क चुनेस। यहोसू एँनका सहर क पच्छिम में छिपइ बरे उ जगह पठएस, जउन बेतेल अउर ऐ क बीच में रही। 13मुख्य डेरा सहर क उत्तर दिसा में रहा। दूसर सिपाहियन पच्छिम में लुकान रहेन। उ रात यहोसू घाटी में बिताएस।

14पाछे, ऐ क राजा इस्त्राएल क फउज क लखेस। राजा अउर ओकर लोग लखेन अउ हाली स इस्त्राएल क फउज स लइइ बरे अगवा बढेन। ऐ क राजा सहर क पूरब यरदन घाटी कईँती बाहेर गवा। एँह बरे उ इ न जान सका कि सहर क पाछे फउजी लुकान रहेन।

15यहोसू अउ इस्त्राएल क सबहिं सिपाहियन ऐ क फउज क जरिये आपन क पाछे ढकेलइ दिहना। यहोसू अउ ओकरे फउजियन पूरब में रेगिस्तान कईँती धाउब सुरू किहना। 16सहर क लोग सोर मचाइ अउर यहोसू क खदेरइ सुरू किहना। अउर ओकरे सिपाहियन सहर तजइ सुरू किहना। 17ऐ अउर बेतेल क सबहिं लोग इस्त्राएल क फउज क पाछा फिहना। सहर खुला छोड़ दीन्ह गवा रहा, कउनो भी सहर क रच्छा बरे नहीं रहा।

18यहोवा यहोसू स कहेस, “आपन भाला क ऐ सहर कईँती किए रहा। मईँ इ सहर तोहका देबउँ।” एँह बरे यहोसू आपन भाला क ऐ सहर कईँती किहस। 19इस्त्राएल क लुकान फउजियन एँका लखेन। उ पचे हाली स आपन लुकाइ क जगहियन स निकरेन अउर सहर कईँती तेजी स चल पड़ेन। उ पचे सहर में घुस गएन अउर ओह पइ कब्जा कइ लिहना। तब फउजियन सहर क बारइ बरे आगी लगाउब सुरू किहना।

20ऐ क लोग मुड़िके लखेन अउ आपन सहर क जरत पाएन। उ पचे धुआँ अकासे में उठत निहारेन। एँह बरे उ पचे आपन ताकत अउ हिम्मत खोइ दिहना। उ पचे इस्त्राएल क लोगन क पाछा करब छोड़ेन। इस्त्राएल क लोगन पराब बन्द किहना। उ पचे मुड़ि गएन अउ ऐ क लोगन स लइइ चल पड़ेन। ऐ क लोगन बरे पराइ क कउनो सुरच्छित जगह नहीं रही। 21यहोसू अउ ओकर फउजियन लखेन कि ओकर फउज सहर पइ कब्जा कइ लिहस। उ पचे सहर स धुआँ

भी उठत निहारेन। इ तब उ पचे पराब बन्द किहन अउर ऐ क लोगन स जुद्ध करइ सुरु किहन। 22तब उ सबइ फउजियन जउन छुकान रहेन, जुद्ध मँ मदद बरे सहर स बाहरे निकरि आएन। ऐ क फउजियन क दुइनउँ कइँती इस्त्राएल क फउजी रहेन, ऐ क फउजी जाल मँ फँस ग रहेन। इस्त्राएल ओनका हराइ दिहस। उ पचे तब तलक लइत रहेन जब तलक ऐ क कउनो भी मनसेधू जिअत न रहा, ओनमँ स कउनो पराइ नाहीं सका। 23मुला ऐ क राजा जिअत छोड़ दीन्ह गावा। यहोसू क फउजी ओका ओकरे लगे लिआएन।

जुद्ध क विवरण

24जुद्ध क समइ, इस्त्राएल क फउज ऐ क फउजियन क मइदानन अउर रेगिस्ताने मँ ढकेल दिहन अउर इ तरह इस्त्राएल क फउज ऐ स सबहिं फउजियन क मारइ क काम मइदानन अउर रेगिस्ताने मँ पूरा किहस। तब इस्त्राएल क सबहिं फउजी ऐ क लउटेन। तब उ पचे ओन लोगन क जउन सहर मँ जिअत रहेन, मारि डाएन। 25उ दिन ऐ क सबहिं लोग मारा गएन। हुआँ बारह हजार मनसेधू अउ मेहरारु रहेन। 26यहोसू आपन भाला क, ऐ कइँती आपन लोगन क सहर बरबाद करइ क संकेत क बनाए राखेस अउर यहोसू संकेत देब तब तलक बन्द नाहीं किहस जब तलक सहर क पुरी आबादी बरबाद नाहीं होइ गएन। 27इस्त्राएल लोग गोरुअन अउ सहर क चीजन्क अपने लगे धरेन। इ उहइ बात रही कि जेका करइ क यहोवा यहोसू क हुकुम देत समइ, कहे रहा।

28तब यहोसू ऐ सहर क बार दिहस। उ सहर सूनी चट्टानन क ढेर बन गावा। इ आजु भी वइसा ही अहइ। 29यहोसू ऐ क राजा क एक बृच्छ पइ फाँसी दइके टाँग दिहस। उ ओका साँझ तलक बृच्छ पइ टाँगा रहइ दिहस। सूरज डूबे पइ यहोसू राजा क ल्हास क बृच्छ स उतारइ क हुकुम दिहस। उ पचे ओका सरीर क सहर क दुआर पइ लोकाइ दिहन अउर इका सिलन स ढाँकि दिहन। सिलन क उ ढेर आजु तलक हुआँइ अहइ।

आसीर्बादन अउ अभिसापन क पढ़ा जाब

30तब यहोसू इस्त्राएल क परमेस्सर यहोवा बरे एक वेदी बनाएस। उ इ वेदी एबाल पर्वत पइ बनाएस। 31यहोवा क सेवक मूसा इस्त्राएल क लोगन क बताए रहा कि वेदियन कइसे बनई जाई। ऐह बरे यहोसू वेदी क वइसे ही बनाएस जइसे मूसा क व्यवस्था क किताबे मँ समुझावा ग रहा। वेदी बगैर कटे भए पाथरन स बनी रही। ओन पाथरन पइ कबहुँ कउनो औजार क उपयोग नाहीं भवा रहा। उ पचे उ वेदी पइ यहोवा क होमबलि अउ मेलबलि चढ़ाएन।

32उ ठउर पइ यहोसू मूसा क व्यसस्था क एक नकल क पाथरन पइ लिखेस। उ इ इस्त्राएल क सबहिं लोगन क लखइ बरे किहस। 33सबइ अगुआ नेता लोग, अफसरन, निआव क अफसरन अउ इस्त्राएल क सबहिं लोग पवितर सन्दूखे क चारिहुँ कइँती खड़ा रहेन। उ पचे ओन लेवी कबीला क याजकन क समन्वा खड़ा रहेन, जउन यहोवा क

करार क पवितर सन्दूखे क लइ चलत रहेन। इस्त्राएली अउर बिदेसी प्रवासियन सबहिं लोग हुआँ खड़ा रहेन। आधा लोग एबाल पर्वत क समन्वा खड़ा रहेन अउर दूसर आधा लोग गिरिज्जीम पर्वत क समन्वा खड़ा रहेन। यहोवा क सेवक मूसा ओनसे अइसा करइ क कहेस रहा। मूसा ओनसे अइसा करइ क इ आसीर्बाद बरे कहे रहा।

34तब यहोसू व्यवस्था क सब वचनन क बाँचेस। यहोसू आसीर्बाद अउ अभिसाप बाँचेस। उ सबहिं कछू उ तरह बाँचेस, जउने तरह उ व्यवस्था क किताबे मँ लिखा रहा। 35इस्त्राएल क सबहिं लोग हुआँ बटुरा रहेन। सबहिं मेहररुअन, गदेलन अउ इस्त्राएल क लोगन क संग रहइवाला सबहिं विदेसियन हुआँ बटुरा रहेन अउ यहोसू मूसा क जरिये दीन्ह गएन हर एक आदेस क बाँचेस।

गिबोनियन क जरिये यहोसू क छला जाब

9 यरदन नदी क पच्छिम क सब राजा लोग इ सबइ घटना क बारे मँ सुनेन। इ सबइ हिल्ली, एमोरी, कनानी, परिज्जी, हिक्वी, यबूसी लोगन क राजा लोग रहेन। उ पचे पहाड़ी भुइँयन अउर मइदानन मँ रहत रहेन। उ पचे लबानोन तलक भूमध्य सागर क किनारन क लगे भी रहत रहेन। उ पचे सबहिं राजा लोग बटुरेन। उ पचे यहोसू अउ इस्त्राएल क लोगन क संग जुद्ध क योजना बनाएन।

3गिबोन क लोग उ तरीका क बारे मँ सुनेन, जेहसे यहोसू यरीहो अउ ऐ क हराए रहा। 4ऐह बरे उ पचे इस्त्राएल क लोगन क धोखा देइ क ठान लिहन। ओनकर इ योजना रही: उ पचे चाम क पुराना बोरियन क आपन गोरुअन पइ लादेस। उ पचे आपन गोरुअन क ऊपर दाखरस क चाम क पुराना मसक क भी डाएन, जेहसे उ पचे अइसा देखींइ पड़ई मान ल्या कि उ पचे बहोतइ दूरी क जात्रा कइके आवा अहईं।

5मनइयन पुरान पनहियन पहिर लिहन। उ पचे पुरान ओढ़ना भी पहिर लिहेन। उ मनइयन कछू बासी, रुखी, खराब रोटियन भी लइ लिहन। इ तरह उ सबइ मनसेधुअन अइसा लगत रहेन मान ल्या उ पचे बहोतइ दूरी क देस स जात्र किहे होईं। 6तब इ सबइ मनसेधुअन इस्त्राएल क लोगन क डेरन क लगे गएन। इ डेरा गिलगाल क लगे रहा।

उ सबइ मनसेधुअन यहोसू क लगे गएन अउर उ पचे ओसे कहेन, “हम लोग एक बहोतइ दूर क देस स आवा अही। हम लोग तोहरे संग सान्ति क सन्धि करइ चाहित ह।”

7इस्त्राएल क लोग इ हिक्वी लोगन स कहेन, “होइ सकत ह तू लोग हम पचन्क धोखा दइ देत ह्वा। होइ सकत ह तू हमरे निचके क रहइवाला ह्वा। हम तब तलक सान्ति क संधि नाहीं कइ सकित जब तलक हम इ नाहीं जान लेइत कि तू पचे कहीं स आवा अहा।”

8हिक्वी लोग यहोसू स कहेन, “हम पचे आप क सेवक अही।”

मुला यहोसू पूछेस, “तू पचे कउन अहा? तू पचे कहीं स आवा अहा?”

१मनसेधुअन जवाब दिहन, “हम लोग आप क सेवक अही। हम पचे एक बहोलइ दूरी क देस स आवा अही। हम ऐह बरे आर कि हम पचे तोहरे परमेस्सर यहोवा क महान सक्ती क बारे में सुना ह। हम लोग उ भी सुने अही, जउन उ किहस। हम लोग उ सब कछू सुना ह, जउन उ मिस्र में किहस। 10अउर हम लोग इ भी सुना कि उ यरदन नदी क पूरब दुइ ठु एमोरी लोगन क राजा लोगन क हराएस। हेस्बोन क राजा सीहोन अउर असतारोत क देस में बासान क राजा ओग रहेन। 11ऐह बरे हमरे अगुआ अउर हमरे लोग हमसे कहेन, ‘आपन जात्रा बरे जियादा भोजन लइ ल्या। जा अउ इस्राएल क लोगन स बात करा। ओनसे कहा, “हम आप क सेवक अही। हम लोगन क संग सान्ति क सन्धि करा।”

12“हमरी रोटियन क लखा। जब हम लोग घर छोड़ तब इ सबइ गर्मागरम अउ ताजी रहिन। मुला अब आप लखत ही कि इ सबइ द्युरान अउ बासी अहई। 13हम लोगन क दाखरस क मसकन क निहारा। जब हम लोग घर तजा तउ इ सबइ नई अउ दाखरस स भरी रहिन। आप लखि सकत ही कि इ सबइ फाट अउ फुरान अहई। हमार ओढनन अउ चपलन क लखा। आप लखि सकत ही कि लम्बी जात्रा हमरी चिजियन क खराब कइ दिहे अहइ।”

14इस्राएल क लोग जाना चाहत रहेन कि इ सबइ मनई का फुरइ बोलत अहई। ऐह बरे उ पचे रोटियन क चखेन, मुला उ पचे यहोवा स नाही पूछेन कि ओनका क करइ चाही।

15यहोसू ओनके संग सान्ति-सन्धि करइ बरे तइयार होइ गवा। उ ओनका जिअत छोड़इ बरे तइयार होइ गवा। इस्राएल क प्रमुखन यहोसू क वचन क समर्थन कइ दिहन।

16तीन दिना पाछे, इस्राएल क लोगन क पता चला कि उ सबइ लोग ओनके डेरा क बहोत निचके रहत ही। 17ऐह बरे इस्राएल क लोग हुआँ गएन, जहाँ उ सबइ लोग रहत रहेन। तीसरे दिन, इस्राएल क लोग गिबोन, कपीरा, बेरोत अउर किर्यत्यारीम सहरन क आएन। 18मुला इस्राएल क फउज इ सहरन क खिलाफ लइइ क जतन नाही किहस। उ पचे ओन लोगन क संग सान्ति संधि कइ चुका रहेन। उ पचे ओन लोगन क संग इस्राएल क परमेस्सर यहोवा क समन्वा प्रण किहे रहेन।

सबहि लोग ओन प्रमुखन क खिलाफ सिकाइत करत रहेन, जउन सन्धि किहे रहेन। 19मुला प्रमुख लोगन जवाब दिहन, “हम पचे प्रण किहे अही। हम लोग इस्राएल क परमेस्सर यहोवा क समन्वा प्रण किहे अही। हम ओनके खिलाफ अब लइ नाही सकित। 20हम लोगन क सिरिफ ऐतना ही करइ चाही। हम ओनका जरुर जिअत रहइ देब। हम ओनका चोट नाही पहुँचाइ सकित काहेकि ओनके संग कीन्ह गवा प्रण क तोड़ देइ पइ यहोवा क किरोध हम लोगन क खिलाफ होइ। 21ऐह बरे ऐनका जिअत रहइ द्या। इ सबइ हमार सेवक होइहीं। उ पचे हमरे बरे लकड़ी कटिहीं अउर हमरे मनइयन बरे पानी ढोइहीं।” इ तरह प्रमुखन इ सबइ लोगन क संग कीन्ह गइ आपन सान्ति-सन्धि क नाही तोड़ें।

22यहोसू गिबोनी लोगन क बोलाएस। उ कहेस, “तू लोग हम स झूठ काहे बोल्या? तोहार भुइँया हम लोगन क डेरा क लगे रहा। मुला तू लोग कह्या कि हम लोग बहोत दूरी क देस क अही। 23अब तोहरे लोगन क बहोत कस्ट होइ। तोहार सबहि लोग दास होइहीं। ओनका परमेस्सर क निवास* बरे लकड़ी काटब अउर पानी भरइ क पड़ी।”

24गिबोनी लोग जवाब दिहन, “हम लोग आप स झूठ बोले काहेकि हम लोगन क डर रहा कि आप कहुँ हम लोगन क मारि न डवईं। हम लोग सुना ह कि परमेस्सर आपन सेवक मूसा क इ आदेस दिहे रहा कि उ पचे तोहका इ सारा भुइँया दइ देई अउर परमेस्सर तोहसे उ भुइँया में रहइवालन सबहि लोगन क मारि डवइ बरे कहेस। इहइ कारण अहइ कि हम लोग आप स झूठ बोले। 25अब हम आप क सेवक अही। आप हमार उपयोग जइसा ठीक समुझईं, कइ सकत हीं।”

26इ तरह गिबोन क लोग दास होइ गएन। मुला यहोसू ओनकर जिन्नगी बचाएस। यहोसू इस्राएल क लोगन क ओनका मारइ नाही दिहस। 27यहोसू गिबोन क लोगन क इस्राएल क लोगन क दास बनइ दिहस। उ पचे इस्राएल क लोगन अउ यहोवा क चुने भए जउनो भी उठर क वेदी बरे लकड़ी काटत अउ पानी भरत रहेन। उ सबइ लोग अब तलक दास अहईं।

उ दिन जब सूरज स्थिर रहा

10 इ समइ अदोनीसेदेक यरूसलेम क राजा रहा। इ राजा सुनेस कि यहोसू ऐ क जीतेस ह अउर एका पूरी तरह बरबाद कइ दिहस ह। राजा क इ पता लाग कि यहोसू यरीहो अउ ओकरे राजा क संग भी इहइ किहस ह। राजा क इ भी जानकारी मिली कि गिबोनी लोग इस्राएल क संग सान्ति-सन्धि कइ लिहस ह अउर उ सबइ लोग यरूसलेम क बहोत निचके रहत रहेन। 2ऐह बरे अदोनीसेदेक अउ ओकर लोग इ सबइ घटना क कारण बहोत डेरान रहेन। गिबोन ऐ क तरह नान्ह सहर नाही रहा। गिबोन एक ठु बहोत बड़ा सहर* रहा जेहमें राजा रहे रहा। अउर सहर क सबहि मनसेधू अच्छा जोधा रहेन। 3यरूसलेम क राजा अदोनीसेदेक हेब्रोन क राजा होहाम स बातन किहसे। उ यर्मूत क राजा पिराम, लाकीस क राजा यापी, एगलोन क राजा दबीर स भी बातचीत किहस। यरूसलेम क राजा इ मनइयन स पराथना किहस, 4“मोरे संग आवईं अउर गिबोन प हमला करइ मैं मोर मदद करईं। गिबोन यहोसू अउ इस्राएल क लोगन क संग सान्ति-सन्धि कइ लिहस ह।”

5इ तरह पाँच एमोरी राजा लोग फउजन क मिलाएन। (इ सबइ पाँचउ यरूसलेम क राजा, हेब्रोन क राजा, यर्मूत क राजा, लाकीस क राजा, अउर एगलोन क राजा रहेन।) उ

परमेस्सर क निवास ऐकर अरथ “परमेस्सर क परिवार” (इस्राएल) या “पवित्र तम्बू” या “मन्दिर” होइ सकत ह।

बड़ा सहर मजबूत अउ अच्छी तरह सुरच्छित सहर जउन निचके क नान्ह सहरन पइ हुकूमत करत रहेन।

सबइ फउज्जन गिबोन गइन्। फउज्जन सहर क घेरि लिहन् अउ एकरे खिलाफ जुद्ध करब सुरु किहन्।

6 गिबोन सहर मँ बसइयन मनइयन गिलगाल क डेरा मँ यहोसू क खबर भेजेन: “हम पचे तोहर सेवक अही। हम लोगन क अकेल्ले मँ जिन तजा। आवा अउर हमार रच्छा करा। हाली करा। हम पचन्क बचावा। पहाड़ी देसन क सबहिं एमोरी राजा आपन आपन फउज्जन क एकउट कइ चुका बाटेन अउर हम पचन पइ हमला किहेस।”

7 एह बरे यहोसू गिलगाल स आपन पूरी फउज्ज क संग जुद्ध बरे चला। यहोसू क उत्तिम जोधा ओकरे संग रहेन। 8 यहोवा यहोसू स कहेस, “ओन फउज्जन स जिन डेराअ। मइँ तू पचन क ओनका हरावइ देब। ओन फउज्जन मँ स कउनो भी तू पचन क हरावइ मँ समर्थ नाहीं होइ।”

9 यहोसू अउ ओकर फउज्ज रात भइ गिबोन कइँती बढ़त रही। दुस्मन क पता नाहीं रहा कि यहोसू आवत अहइ। एँह बरे जब उ हमला किहस तउ उ पचे चौक पड़ेन।

10 यहोवा ओन फउज्जन क इस्त्राएल क फउज्जन क जरिये हमाला क समइ का करइ या न करइ चाही सोच मँ डाइ दिहस। यह बरे इस्त्राएलियन ओनका हराइके बहोत बड़ी जीत पाइ लिहन्। इस्त्राएलियन पाछा कइके ओनका गिबोन स खदेर दिहन्। उ पचे बेथोरोन तलक जाइवाली सड़क तलक ओनकर खदेर दिहन्। इस्त्राएल क फउज्ज अजेका अउ मक्केदा तलक क समूचइ राहे मँ मनसेधुअन क मारेस। 11 इस्त्राएल क फउज्ज बेथ-हरोन क जाइवाली सड़क तलक दुस्मनन क खदेर दिहस। जबहिं उ पचे दुस्मनन क खदेरत रहेन तउ यहोवा भारी ओला क बर्खा अजेका तलक अकासे स किहस। बहोत स दुस्मन एँन भारी ओला क बर्खा स मरि गएन। इ सबइ ओला स ओहसे जियादा दुस्मन मारा गएन जेतना इस्त्रलियन क तरवानन स मरि ग रहेन।

12 उ दिना यहोवा इस्त्राएलियन क जरिये एमोरी लोगन हार जाइ दिहन् अउ उ दिन यहोसू इस्त्राएल क सबहिं क समन्वा खड़ा भवा अउ उ यहोवा स कहेस:

“हे सूरज, गिबोन क अकासे मँ खड़ा रहा अउ हट्या जिन। हे चन्द्र, तू अथ्यालोन क घाटी क ऊपर अकासे मँ ठाड़ रहा अउ जिन हटा।”

13 सूरज स्थिर होइ गवा अउ चन्दा भी तबहिं तलक चलब तजि दिहस जब तलक मनइयन आपन दुस्मनन क हराइ नाहीं दिहन्। इ फूरे भवा, इ कथा यासार क किताबे मँ लिखी अहइ। सूरज असमान क बीच रुका। इ पूरा दिन हुआँ स नाहीं हटा। 14 अइसा उ दिन क पहिले कउनो भी समइ कबहुँ नाहीं भवा रहा अउर तब स अब तलक कबहुँ नाहीं भवा बाटइ। उहर दिन रहा, जब यहोवा मनई क बिनती सुनेस। असल मँ यहोवा इस्त्राएलियन बरे जुद्ध करत रहा।

15 एकरे पाछे, यहोवा अउ ओकर फउज्ज गिलगाल क डेरा मँ वापस भइ। 16 जुद्ध क समइ पाँचहु राजा पराइ गएन। उ पचे मक्केदा क निअरे गुफा मँ लुकाइ गएन। 17 मुला कछु मनइयन ओनका गुफा मँ लुका भवा पाएस। यहोसू क एकरे बारे मँ पता चला। 18 एँह बरे उ कहेस, “गुफा क जाइवाला दुआरे क बड़वार सिलन स ढाँपि द्या। कछु मनसेधुअन क गुफा क रखवारी बरे हुआँ रखा। 19 मुला हुआँ

खुद न रहा। दुस्मन क पाछा करत रहा। ओन पइ पाछे स हमला करत रहा। दुस्मनन क आपन सहर तलक सुरच्छित जिन पहाँचइ द्या काहेकि तोहार परमेस्सर यहोवा तू पचन्क ओन पइ विजय दिहेस ह।”

20 इ तरह यहोसू अउ इस्त्राएल क मनइयन दुस्मनन क मर जाएन। मुला दुस्मनन मँ स कछु आपन सहरन मँ जाइ सकेन अउ लुकाइ गएन। उ सबइ मनइयन नाहीं मारा गएन। 21 जुद्ध क पाछे, यहोसू क फउजी मक्केदा मँ ओनके लगे आएन। उ प्रदेस मँ कउनो मँ कउनो भी जाति क लोगन मँ स कउनो भी एँतना हिम्मती नाहीं रहा कि उ लोगन क खिलाफ कछु कहि सकइ।

22 यहोसू कहेस, “गुफा क दुआर क रोकइवाली सिलन क हटावा। ओन पाँचउ राजा लोगन क मोरे लगे लिआवा।” 23 एँह बरे यहोसू क लोग पाँचउ राजा लोगन क गुफा स बाहरे लिआएन। इ सबइ पाँचउ यरूसलेम, हेब्रोन, यमूर्त, लाकीस अउ एग्लोन क राजा लोग रहेन। 24 एँह बरे उ सबइ ओन पाँचउ राजा लोगन क यहोसू क लगे लिआएन। यहोसू आपन सबहिं लोगन क हुआँ आवइ बरे कहेस। यहोसू फउज्ज क अफसरन स कहेस, “हिआँ आवा। एँन राजा लोगन क गले पइ आपन गोड़ धरा।” एँह बरे यहोसू क फउज्ज क अफसर लोग निचके आएन। उ पचे राजा लोगन क गले पइ आपन गोड़ धरेन।

25 तब यहोसू आपन फउज्जियन स कहेस, “मजबूत अउ हिम्मती बना। डेराअ जिन। मइँ देखाउब कि यहोवा ओन दुस्मनन क संग का करी, जेनसे तू पचे भविस्स मँ जुद्ध करब्या।”

26 तब यहोसू पाँचउ राजा लोगन क मार जाएस। उ ओनकर लहास पाँच ठु बूच्छन पइ लटकाइ दिहस। यहोसू ओनका सूरज बूड़इ तलक हुआँइ लटकत छोड़े रखा। 27 सूरज बूड़े पइ यहोसू आपन लोगन स लहासन क बूच्छन स उतारइ क कहेस। तब उ पचे ओन लहासन क उ गुफा मँ बहाइ दिहस, जेहमँ उ पचे लुकान रहेन। उ पचे गुफा क दुआर क बड़वार पाथर क सिलन स ढाँकि दिहन्, जउन आजु तलक हुआँइ अहइँ।

28 उ दिन यहोसू मक्केदा क हराएस। यहोसू राजा अउ उ सहर क लोगन क मार जाएस। हुआँ कउनो मनई जिअत नाहीं छोड़ा गवा। यहोसू मक्केदा क राजा क संग उहइ किहस जउन उ यरीहो क राजा क संग किहे रहा।

दक्खिनी सहरन क लीन्ह जाब

29 तब यहोसू ऊउ इस्त्राएल क सबहिं लोग मक्केदा स जात्रा किहन्। उ पचे लिब्ना गएन अउर उ सहर पइ हमला किहन्। 30 यहोवा इस्त्राएल क लोगन क उ सहर अउ ओकरे राजा क हार जाइ दिहस। इस्त्राएल क लोग उ सहर क हर मनई क मार जाएन। कउनो मनई जिअत नाहीं छोड़ा गवा। यहोसू लिब्नाह क राजा क संग उहइ किहेस जइसा उ पचे यरीहो क राजा क संग किहे रहेन।

31 तब यहोसू अउ इस्त्राएल क सबहिं लोग लिब्ना क तजि दिहन् अउर उ पचे लाकीस तलक क जात्रा किहन्। यहोसू अउ ओकर फउज्ज लिब्ना क चारिहुँ कइँती डेरा जाएस

अउर तब उ पचे सहर पइ हमला किहन। 32यहोवा इस्राएल क मनइयन क जरीये लाकीस सहर क हार जाइ दिहस। दुसरे दिना उ पचे सहर क हराएन। इस्राएल क मनइयन इ सहर क हर एक मनई क मार डाएन। इ वइस ही रहा जइसा उ लिब्ना में किहे रहा। 33इहइ समइ गोजेर क राजा होरोम लाकीस क मदद करइ आवा। मुला यहोसू ओका अउ ओकरी फउज क भी हराएस। कउनो मनई जिअत नाही छोड़ा गवा।

34तब यहोसू अठर इस्राएल क सबहिं लोग लाकीस स एग्लोन गएन। उ पचे एग्लोन क चारिहुँ कइँती डेरा डाएन अउर ओह पइ हमला किहन। 35उहइ दिन उ पचे सहर पइ कब्जा किहन अउर सहर क सबहिं लोगन क मार डाएन। इ वइसा ही किहन जइसा उ पचे लाकीस में किहे रहेन। उ पचे सहर क बरबाद किहन अउ ओकरे सबहिं मनइयन क मार डाएन।

36तब यहोसू अउ इस्राएल क सबहिं लोग एग्लोन स हेब्रोन क जात्रा किहन। उ पचे हेब्रोन पइ हमला किहन। 37उ पचे सहर अउ हेब्रोन क निअरे क सबहिं नान्ह कस्बन पइ कब्जा कइ लिहन। इस्राएल क लोग सहर क हर एक मनई क मार डाएन। हुआँ कउनो भी जिअत नाही छोड़ा गवा। इ वइसा ही रहा जइसा उ पचे एग्लोन में किहे रहेन। उ पचे सहर क बरबाद किहन अउ ओकर सबहिं मनइयन क मार डाएन।

38तब यहोसू अउ इस्राएल क सबहिं लोग दबीर क गएन अउर उ सहर पइ हमला किहन। 39उ पचे उ सहर, ओकर राजा अउ दबीर क निअरे क सबहिं कस्बन क जीत लिहन। उ पचे उ सहर क सबहिं लोगन क मार डाएन। हुआँ कउनो जिअत नाही छोड़ा गवा। इस्राएल का मनइयन दबीर अउ ओकरे राजा क संग उहइ किहन जउन उ पचे हेब्रोन अउ ओकरे राजा क संग किहे रहेन। इ वइसा ही रहा जइसा उ पचे लिब्ना अउ ओकरे राजा क संग किहे रहेन।

40इ तरह यहोसू पहाड़ी देस नेगेव पच्छिमी अउ पूर्वी पहाड़ियन क तराई क सहरन क राजा लोगन क हराएन। इस्राएल क परमेस्सर यहोवा यहोसू स सबहिं लोगन क मारि डावइ क हुकुम दिहे रहा। एँह बरे यहोसू ओन जगहियन पइ कउनो क जिअत नाही छोड़ेस।

41यहोसू कादेसबर्ने स अज्जा तलक क सबहिं सहरन पइ कब्जा कइ लिहस। उ गोसेन क भुईया स लइके गिबोन तलक क सबहिं सहरन पइ कब्जा कइ लिहस। 42यहोसू एक अभियान में ओन सहरन अउ ओनके राजा लोगन क जीत लिहस। यहोसू इ एँह बरे किहस कि इस्राएल क परमेस्सर यहोवा इस्राएल बरे लइत रहा। 43तब यहोसू अउ इस्राएल क सबहिं लोग गिलगाल क आपन डेरा में लउटि आएन।

उत्तरी सहरन क हराउब

11 हासेर क राजा, याबीन जउन कछू भवा ओकरे बारे में सुनेस। एँह बरे उ कइउ राजा लोगन क फउजन क एक संग बोलावइ क निर्णय लिहस। याबीन मादोन क राजा योबाब, सिमोन क राजा, अच्छाप क राजा अउर 2उत्तर

क पहाड़ी देस क अउ रेगिस्ताने क सबहिं सासकन लोगन क लगे संदेसा पठएस। याबीन किन्नेरेत क दक्खिन क राजा लोगन, नेगेव अउ पच्छिम निची पहाड़ियन क राजा लोगन क आपन सँदेसा पठएस। उ पच्छिम में नफोथ दारे क राजा क भी सँदेसा पठएस। 3याबीन पूरब अउ पच्छिम क कनानी लोगन क राजा लोगन क लगे सँदेसा पठएस। उ पहाड़ी प्रदेशन में बसइयन एमोरी, हित्तियन, परिज्जियन अउ यबूसियन क लगे सँदेसा पठएस। उ मिसपा पहुँटा क हेर्मोन पहाड़ क नीचे बसइयन हिक्वी लोगन क भी सँदेसा पठएस। 4एँह बरे एँन सबहिं राजा लोगन क फउजन एक संग आइन। हुआँ अनेक जोधा, घोड़न अउ रथ रहेन। उ बहोत बड़वार फउज रही, उ अइसी देखाइ पड़त रही, मान ल्या ओहमाँ एँतना फउजी रहेन जेतना समुदर क किनारे बालू क कण।

5इ सबइ राजा छोटकी नदी मेरोम क निअरे बंदुर गएन। उ पचे आपन फउजन क एक डेरा में बटोरेन। उ पचे इस्राएल क खिलाफ जुद्ध करइ क योजना बनाएन।

6तब यहोवा यहोसू स कहेस, “उ फउज स जिन डेराअ। भियान इहइ समइ, मई तू पचन्क ओनका हरावइ देब। तू पचे ओन सबहिं क मार डउब्या। तू पचे ओनकइ घोड़न क लगड़ा छूला करइ देब्या। अउ ओनकर सबहिं रथन क बार डउब्या।”

7यहोसू अउ ओकर पूरी फउज एकाएक हमला कइके ओनका चौकाइ दिहस। उ पचे मेरोम नदी पइ दुस्मनन पइ हमला किहन। 8यहोवा इस्राएलियन क ओनका हरावइ दिहस। इस्राएल क फउज ओनका हराएस अउर ओनकर पूरब में वृहत्तर सीदोन, मिस्त्रपोत-मैम अउ मिसपा क घाटी तलक पाछा किहस। इस्राएल क फउज ओनसे तब तलक जुद्ध करत रही जब तलक दुस्मनन में स कउनो भी मनई जिअत न बचा। 9यहोसू उहइ किहस जउन यहोवा कहे रहा कि उ करी यानी यहोसू ओनकइ घोड़न क टँगियन काटेस अउ ओनकर स्यन क बारेस।

10तब यहोसू लउटा अउ हासोर सहर पइ कब्जा किहस। यहोसू हासोर क राजा क मार डाएस। (हासोर ओन सबहिं राज्यन में प्रमुख रहा जउन इस्राएल क खिलाफ लड़ा रहेन।) 11इस्राएल क फउज उ सहर क हर एक क मार डाएस। उ पचे सब लोगन क पूरी तरह बरबाद कइ दिहन। हुआँ कछू भी जिअत नाही रहइ दीन्ह गवा। तब उ पचे सहर क जराइ दिहन।

12यहोसू इ सबइ सहरन पइ कब्जा किहस। उ ओनके सबहिं राजा लोगन क मार डाएस। यहोसू इ सबइ सहरन क हर एक चीज क पूरी तरह बरबाद कइ दिहस। उ इ यहोवा क सेवक मूसा जइसा हुकुम दिहे रहा वइसा ही किहस। 13मुला इस्राएल क फउज कउनो भी अइसे सहर क नाही जराएस जउन पहाड़ी पइ बना रहा। उ पचे पहाड़ी पइ बने सिरिफ एक ठु हासोर सहर क जराएस। इ उ सहर रहा, जेका यहोसू बारेस। 14इस्राएल क मनइयन उ सबइ चिजियन क आपन लगे धरेन, जउन ओनका उ सहरन में स मिलिन। उ पचे ओन जनावरन क अपन लगे धरेन, जउन ओनका सहर में मिलेन। मुला उ पचे हुआँ क सबहिं मनइयन क मार डाएन। उ पचे कउनो मनई क जिअत नाही छोड़ेन।

15यहोवा बहोत पहिले आपन सेवक मूसा क इ करइ क हुकुम दिहे रहा। तब मूसा यहोवा क इ करइ क हुकुम दिहे रहा। इ तरह यहोसू यहोवा क आग्या पूरा किहस।

16काहेकि उ ओन चिजियन में स कछु भी नाहीं लिहस जउन का यहोवा लइ क हुकुम नाहीं दिहे रहा। इ तरह यहोसू इ पूरे देस क सबहिं लोगन क हराइ दिहस। पहाड़ी प्रदेस, नेगेव-छेत्र, सारा गोसोन-छेत्र, पच्छिमी निची पहाड़ियन क प्रदेस, यरदन घाटी, इस्राएल क पहाड़ अउ ओनकर निचके क पहाड़ियन पइ ओकर अधिकार होइ गवा रहा। 17यहोसू क अधिकार सेईर क निअरे हालाक पहाड़े स लइके हेर्मान पहाड़े क खाले लबानोन क घाटी में बालगाद तलक क प्रवेस पइ होइ ग रहा। उ राजा लोगन क गिरफतार कइ क मरि दिहे रहा। 18यहोसू ओन राजा लोगन स कइउ बरिस लड़ा। 19उ पूरा देस में सिरिफ एक सहर इस्राएल क संग सान्ति-संधि किहस। उ हिब्बी लोगन क सहर गिबोन रहा। दूसर सबहीं सहर जुद्ध में हार गएन। 20यहोवा चाहत रहा कि उ सबइ लोग सोचई कि उ पचे सक्तीसाली रहेन। तब उ पचे इस्राएल क खिलाफ लड़िहीं। इ तरह उ पचे बगैर दया क ओनका बरबाद कइ सकत रहेन, जउने तरह यहोवा मूसा क करइ क हुकुम दिहे रहा।

21अनाकी लोग हेब्रोन, दबीर, अनाब अउ यहूदा अउर इस्राएल क छेत्रन क पहाड़ी प्रदेस में रहत रहेन। यहोसू इ सबइ अनाकी लोगन क खिलाफ लड़ा। यहोसू इ लोगन अउ इ सबन्क सहरन क पूरी तरह बरबाद कइ दिहस। 22हुआँ कउनो भी अनाकी मनई इस्राएल में जिअत न छोड़ा गवा। जउन अनाकी लोग छोड़ दीन्ह ग रहेन, उ सबइ अज्जा, गत अउर असदोद में रहेन। 23यहोसू पूरा इस्राएल प्रदेस पइ कब्जा कइ लिहस। इ बात क यहोवा मूसा स बहोत पहिले ही कहि दिहस। यहोवा उ इ देस इस्राएल क एँह बरे देहस काहेकि उ एँनकइ बरे वचन दिहे रहा। तब यहोसू इस्राएल क परिवार समूहन में उ प्रदेस क बाँट दिहस तब जुद्ध बन्द भवा अउ अखिरी रुप में सान्ति कायम होइ गइ।

इस्राएल क जरिये राजा लोग हरावा गएन

12 इस्राएल क लोग यरदन नदी क पूरब क भुईया पइ कब्जा कइ लिहन। ओनकइ अधिकार में अब अर्नोन क संकरी घाटी स हेर्मान पहाड़े तलक क भुईया अउ यरदन घाटी क पूरब क सारा प्रदेस रहा। इ देस क लेइ बरे इस्राएल क लोग जउन राजा लोग क हराएन ओनकइ इ सूची अहइ:

2हेसबोन सहर में बसइयन एमोरी लोगन क राजा सीहोन अर्नोन क संकरी घाटी पइ अरोएर स लइके यब्बोक नदी तलक क प्रदेस पइ सासन करत रहा। ओकर प्रदेस उ दरी क बीच स सुरु होत रहा। अम्मोनी लोगन क संग इ ओनकर चउहद्दी रही। सीहोन गिलाद क आधा प्रदेस पइ हुकूमत करत रहा। 3उ गिलगाल स मृत सागर (खारा सागर) तलक यरदन क पूरब क प्रदेस पइ भी सासन करत रहा अउ बेत्यसीमोत स दक्खिन पिसगा क पहाड़ियन तलक सासन करत रहा।

4बासान क राजा ओग रपाई लोगन संतान रहा। ओग असतारोत अउ एद्रेई में सासन करत रहा। 5ओग हेर्मान पहाड़, सलका सहर, अउ बासान क समूचइ छेत्र पइ सासन करत रहा। ओकरे प्रदेस क चउहद्दी हुआँ तलक जात रही जहाँ गसूर अउ माका लोग रहत रहेन। ओग गिलाद क आधा भाग पइ सासन करत रहा। इ प्रदेस क सीमा क आखीर हेसबोन क राजा सीहोन क प्रदेस पइ होत रहा।

6यहोवा क सेवक मूसा अउ इस्राएल क लोग इ सबहिं राजा लोगन क हराएन अउ मूसा उ प्रदेस क रूबेन क परिवार समूह, गाद क परिवार समूह अउ मनस्से क परिवार समूह क आधा लोगन क दिहस। मूसा इ प्रदेस ओनका आपन कब्जा में रखइ बरे दिहस।

7इस्राएल क लोग उ प्रदेस क राजा लोगन क भी हराएन, जउन यरदन नदी क पच्छिम में रहा। यहोसू लोगन क इ प्रदेस में लइ गवा। यहोसू लोगन क इ पहेँटा दिहस अउर एका साढ़े नौ परिवार समूहन में बाटेस। इ उ देस रहा जेका ओनका देइ बरे यहोवा वचन दिहे रहा। इ प्रदेस लबानोन क घाटी में बालगात अउ सेईर क निअरे हालाक पहाड़े क बीच रहा। 8एहमों पहाड़ी देस, पच्छिम क तराई क प्रदेस, यरदन घाटी, पूर्वी पहाड़ियन, रेगिस्तन अउ नेगेव सामिल रहेन। इ उ प्रदेस रहा जेहमों हित्ती, एमोरी, परिज्जी, कनानी, अब्बी अउर यबूसी लोग रहत रहेन। जउन लोगन क इस्राएल क लोग हराएन ओनकर सूची इ बाटइ:

| | |
|------------------------|---|
| 9यरीहो क राजा | 1 |
| ऐ क राजा बेतेल क निअरे | 1 |
| 10यरूसलेम क राजा | 1 |
| हेब्रोन क राजा | 1 |
| 11यर्मूत क राजा | 1 |
| लाकीस क राजा | 1 |
| 12एगलोन क राजा | 1 |
| गेजेर क राजा | 1 |
| 13दबीर क राजा | 1 |
| गेदेर क राजा | 1 |
| 14होर्मा क राजा | 1 |
| अराद क राजा | 1 |
| 15लिब्ना क राजा | 1 |
| अदुल्लाम क राजा | 1 |
| 16मक्केदा क राजा | 1 |
| बेतेल क राजा | 1 |
| 17तप्पूह क राजा | 1 |
| हेपेर क राजा | 1 |
| 18अपेक क राजा | 1 |
| लरसारोन क राजा | 1 |
| 19मादोन क राजा | 1 |
| हासोर क राजा | 1 |
| 20सिम्रोन मरोन क राजा | 1 |
| अच्छाप क राजा | 1 |
| 21तानाक क राजा | 1 |
| मगिद्दो क राजा | 1 |

| | |
|-------------------------------------|----|
| 22केदेस क राजा | 1 |
| कर्मेल में योकनाम क राजा | 1 |
| 23दोर क पर्वत में दोर क राजा | 1 |
| गिलगाल में गोयीम क राजा | 1 |
| 24तिर्सी क राजा | 1 |
| सब मिलाइके राजा लोगन क संख्याँ रहेन | 31 |

प्रदेस जउन अबहिं तलक नाहीं लीन्ह गएन

13 जब यहोसू बहोतइ बुढ़वा होइ गवा तउ यहोवा ओहसे कहेस, “यहोसू तू बुढ़वा होइ ग अहा, मुला अबहिं तोहका बहोत स भुइँया पइ कब्जा करइ क बाटइ। 2तू अबहिं तलक गसूर लोगन क भुइँया अउर पलिस्तिन क भुइँया नाहीं लिह्या ह। 3तू मिस्त्र क चउहद्दी पइ सिहोर नदी स लइके उत्तर में एक्रोन चउहद्दी तलक क छेत्र नहीं लिह्या ह। उ उबहिं तलक कनानी लोगन क अहइ। तू पचन्क अज्जा, असदोद, असकलोन, गत अउ एक्रोन पाँचहूँ पलिस्ती क प्रमुख्य सहरन क हराउब अहइ। तू पचन्क ओन अब्बी लोगन्क हरावइ चाही, 4जउन कनान क सारे भुइँया क दक्खिन में अउर मिराह में जउन कि सिदोनी लोगन, अफेक क अधिकार में अहइ अउर अमोरी लोगन सरहद तलक क भुइँया में रहत हीं। 5तू अभी तलक गबाली लोगन्क छेत्र क नाहीं हराया ह अउर बालगाद क पूरब अउ हेर्मान पहाड़े क घाटी हमाथ क प्रवेस दुआर तलक क बीच क अलबानोन क छेत्र भी अभी तलक हराइ क बचा भवा अहइ।

6“सिदोन क लोग लबानोन स मिस्त्रपोतमैम तलक पहाड़ी प्रदेस में रहत अहइ। मुला मई इस्राएल क लोगन बरे इ सबहिं क दबाइके निकारि बाहेर करब। जब तू इस्राएल क लोगन में भुइँया बाँट्या, तु इ प्रदेस क निहचय ही सुमिर लिह्या। एँका वइसेन ही करा जइसेन मई कहेउँ ह। 7अब, तू भुइँया क नौ परिवार समूह अउ मनस्से क आधा परिवार समूह क मैं बाटा।”

प्रदेसन क बाँटवारा

8मई मनस्से क आधा परिवार समूह क लोगन क पहिले ही भुइँया दइ दीन्ह ह। मई रूबेन क परिवार समूह अउ गाद क परिवार समूह क भी पहिले ही भुइँया दइ दीन्ह ह। यहोवा क सेवक मूसा यरदन नदी क पूरब क प्रदेस ओनका दिहस। 9मूसा अउन भुइँया यरदन नदी क पूरब मैं ओनका दिहे रहा, उ इ अहइ: इ भुइँया क भीतर दीबोन स मेदबा तलक क पूरा मइदान आवत ह। इ भुइँया अर्नी सँकरी घाटी स सुरु होत ह। इ भुइँया घाटी क बीच सहर तलक लगातार फइली अहइ। 10एमोरी लोगन क राजा सीहोन जउने सहरन पइ सासन करत रहा, उ पचे इ भुइँया में रहेन। उ राजा हेसबोन सहर मैं सासन करत रहा। उ भुइँया लगातार उ छेत्र तलक रही जेहमँ एमोरी लोग रहत रहेन। 11गिलाद सहर भी अहइ भुइँया में रहा। गसूर अउ माका लोग जउने छेत्र मैं रहत रहेन उ उहइ भुइँया में रहा। सारा हेर्मान पहाड़ अउर सल्का तलक सारा बासान उ भुइँया में रहा। 12राजा

ओग क सारा राज्ज उहइ भुइँया में रहा। राजा ओग बासान मैं सासन करत रहा। पहिले उ आसतरोत अउ एदेई मैं सासन करत रहा। ओग रपाइ लोगन मैं स रहा। मूसा ओन लोगन क हराए रहा अउर ओनका प्रदेस लइ लिहे रहा। 13इस्राएल क लोग गसूर अउर माका लोगन क जबरदस्ती निकारिके बाहेर नाहीं कइ सकेन। उ सबइ लोग अब तलक आजु भी इस्राएल क लोगन क संग रहत रहेन।

14सिरिफ लेवी क परिवार समूह ही अइसा रहा जेका कउनो भुइँया नाहीं मिली। ओकरे बदले आनेका उ सबइ भेंटन मिलिन जेका इस्राएल क परमेस्सर यहोवा क चढ़ाई जात रहिन। यहोवा लेवी परिवार समूह क सन्तानन क इ वचन दिहे रहा।

15मूसा रूबेन क परिवार समूह स हर एक परिवार समूह क कछू भुइँया दिहस। इ भुइँया अहइ जेका उ पचे पाएन 16अर्नोन क सँकरी घाटी क निअरे अरोएर स लइके मेदबा सहर तलक क भुइँया। एहमँ सारा मइदान अउ दरकि बीचक सहर सामिल रहा।

17इ भुइँया हेसबोन तलक लगातार फइली रही। इ भुइँया मैं मइदान क सबहिं सहर रहेन। इ सबइ सहर दीबोन, बोमोतबाल, बेतबालमोन, 18यहसा, कदेमोत, मेपात, 19किर्यातैम, सिबमा, इ मैं घाटी क सहरन सेरेध-साहार, 20बेतपोर, पिसगा क पहाड़ियन अउ बेत्यसीमोत सामिल रहेन। 21इ भुइँया मैं मइदान क सबहिं सहर अउ एमोरी लोगन क राजा सीहोन जउने छेत्रन पइ सासन किहे रहा उ सबइ छेत्र रहा। उ राजा हेसबोन पइ सासन किहे रहा। मुला मूसा ओका अउर मिद्यानी लोगन क हराए रहा। उ सबइ लोग एवी, रेकेम, सूर, हूर अउर रेबा रहेन। इ सबइ नेतन जउन उ देस मैं रहत रहेन सीहोन क संग जुद्ध करत रहेन। 22इस्राएल क लोग बारे क पूत बिलाम क मारेन। बिलाम भविस्सवाणी बरे जादू क उपयोग करइ क जतन किहस। इस्राएल क लोग जुद्ध मैं अनेक लोगन क मारेन। 23जउन पहँटा रूबेन क दीन्ह ग रहा, ओकर अन्त यरदन नदी क किनारे पइ होत रहा। एँह बरे इ भुइँया रूबेन क परिवार समूहन क दइ दीन्ह गइ, एहमँ इ सबइ सहर अउ सूची मैं लिखे भए सबहिं खेत सामिल रहेन।

24मूसा गाद क परिवार समूह क भुइँया क गाद कबिलन क बीच मैं बाँटे दिहस।

25गाद क प्रदेस याजेर क पहँटा अउ गिलाद क सबहिं नगर मैं रहेन। मूसा ओनका अम्मोनी लोगन क भुइँया का आधा हींसा रब्बा क निअरे अरोएर तलक भी दिहे रहा। 26इ प्रदेस मैं हेसबोन रामतमिस्पे अउ बेतोनीम क छेत्र सामिल रहेन। इ प्रदेस मैं महनैम स दबीर तलक क छेत्र सामिल रहेन। 27एहमँ बेथारम क घाटी, बेत्रिम्ना, सुक्कोत अउर सापोन सामिल रहेन। बाकी क उ समूचा हींसा जेह पइ हेसबोन क राजा सीहोन सासन किहे रहा, एहमँ सामिल रहा। इ भुइँया यरदन नदी क पूरब कइती अहइ। इ भुइँया लगातार गलील झिलिया क आखीर तलक फइली अहइ। 28इ सारा पहँटा उ अहइ जेका मूसा गाद क परिवार समूह क दिहे रहा। इ भुइँया मैं इ सबइ देस रहेन जउन सूची मैं अहइ। मूसा उ भुइँया हर एक कबिलन क बाँटे दिहस।

29मूसा मनस्से क आधा परिवार समूह क कबिलन क बीच में भी भुइँया बांटे रहा। मनस्से क परिवार समूह क कबिलना इ भुइँया पाएन:

30भुइँया महनैम स सुरु भइ। एहमों उ पूरा बासान यानी जउन सारा प्रदेस पइ बासान क राजा ओग सासन करत रहा अउर बासान में याइर क सबहिं सहर सामिल रहेन। (सब मिलाइके साठ सहर रहेन।) 31इ भुइँया में आधा गिलाद, अस्तारोत अउ एदेई सामिल रहेन। (गिलाद, अस्तारोत अउ एदेई उ सबइ सहर रहेन जेहमों ओग रहत रहा।) इ सारा प्रदेस मनस्से क पूत माकीर क परिवार क दीन्ह गएन। ऐन आधा पूतन इ पहँटा क पाएन।

32मूसा मोआब क मइदान में इ सबइ परिवार समूह क इ पूरी भुइँया दिहस। इ यरीहो क पूरब में यरदन नदी क पार रही। 33मुला मूसा लेवी परिवार समूह क कउनो भुइँया नाहीं दिहस। इस्राएल क परमेस्सर यहोवा इ वचन दिहस कि उ खुद लेवी क परिवार समूह क भेंट क रूप में होइ।

14 याजक एलीआज़ार, नून क पूत यहोसू अउ इस्राएल क परिवार समूह क प्रमुख लोग निहचय किहिन कि उ पचे कउने भुइँया क कउन लोगन क दिहन। इ सारी भुइँया यरदन नदी क पच्छिम कइँती कनान में रहेन। 2यहोवा उ ढंग मूसा क बहोत पहिले बताइ दिहे, जउने ढंग स उ चाहत रहा कि लोग आपन भुइँया चुनइँ। साढ़े नौ परिवार समूह क लोग कउन स भुइँया उ पचे पइहीं ऐंकर निहचय करइ बरे गोट डाएन। 3मूसा अढ़ाई परिवार समूहन क ओनकर भुइँया ओनका यरदन नदी क पूरब में दइ दिहे रहा। मुला लेवी क परिवार समूह क दूसर लोगन क तरह कउनो भी भुइँया नाहीं मिली। 4बारह परिवार समूहन क आपन खुद क भुइँया दइ दीन्ह गइ। यूसुफ क पूत दुइ परिवार-समूहन-मनस्से अउ एप्रैम में बँट ग रहेन अउर हर एक परिवार समूह कछु भुइँया पाइ लिहस। मुला लेवी क परिवार समूह क कबिलन क कउनो भुइँया नाहीं दीन्ह गइ। ओनका रहइ बरे कछु सहर दीन्ह ग रहेन अउर इ सबइ सहर हर एक परिवार-समूह क भुइँया में रहेन। ओनका जनावरन बरे खेत भी दीन्ह ग रहेन। 5यहोवा मूसा क बताइ दिहे रहा कि उ कउने ढंग स इस्राएल क परिवार समूहन क भुइँया देइ। इस्राएल क लोग उहइ ढंग स भुइँया क बाँटेन, जउने ढंग स बाँटेइ बरे यहोवा क हुकुम रहा।

कालेब क ओकर प्रदेस मिलत ह

6एक दिन यहूदा परिवार समूह क लोग गिलगाल में यहोसू क लगे गएन। ओन लोगन में कनजी यपुन्ने क पूत कालेब रहा। कालेब यहोसू स कहेस, “कादेसबर्ने में यहोवा जउन बातन कहे रहा। तोहका याद अहइ। यहोवा आपन सेवक* बातन करत रहा। यहोवा तोहरे अउ मोरे बारे में बात करता रहा। 7यहोवा क सेवक मूसा मोका उ भुइँया क जासूसी करइ बरे पठएस जहाँ हम पचे जात रहे। उ समइया मई चालीस बरिस क रहेउँ। जब मई लउटेउँ तउ मूसा क मई उ बताएउँ, जउन मई उ भुइँया क बारे में अनुभव

राखत रहेउँ। 8मुला जउन दूसर मनई मोरे संग गए रहेन उ पचे ओनसे अइसी बातन किहिन जेहसे लोग डेराइ गएन। मुला मई यहोवा क हुकुमन क वफादारी स पालन किहस। 9एह बरे मूसा वचन दिहसा, ‘जउने देस में तू गए रह्या उ तोहार होइ। उ देस सदा तोहरे गदेलन क होइ। मई उ छेत्र तोहका देब, काहेकि तू यहोवा मोरे परमेस्सर पइ पूरा भरोसा किह्या ह।’

10“अब, सोचा कि उ समइ स यहोवा जइसा कहे रहा उहइ तरह मोका पैतालीस बरिस तलक जिअत रखेस ह। उ समइ हम सब रेगिस्तान में भटकत रहेन। अब, मई पचासी बरिस क होइ गवा हउँ। 11मई अबहुँ भी ओतना ही सकतीसाली हउँ जेतना सक्तीसाली मई उ समइ रहेउँ, जब मूसा मोका पठए रहा। मई ओन दिनन क तरह अब भी जुद्ध करइ क तइयार अहउँ। 12एह बरे उ पहाड़ी देस मोका दइ द्या जेका यहोवा बहोत पहिले उ दिन मोका देइ क वचन दिहे रहा। उ समइ तोहका पता लग रहा कि सहर बहोत बड़ा अउर किलेदार रहेन अउ ओन दिनन सक्तीसाली अनाकी लोग ओन सहरन पइ सासन करत रहेन। मुला अब यहोवा मोरे संग अहइ अउर मई उ प्रदेस क वइसेन ही लइ लेब जइसा यहोवा कहेस ह।”

13यहोसू यपुन्ने क पूत कालेब क आसीर्बद दिहस। यहोसू हेब्रोन सहर क ओकरे अधिकार में दइ दिहस। 14अउर उ सहर अब भी कनजी यपुन्ने क पूत कालेब क परिवार क अहइ। उ प्रदेस अब तलक ओकरे लोगन क अहइ काहेकि, उ इस्राएल क परमेस्सर यहोवा क आग्या मानेस अउर ओह पइ पूरा बिस्वास किहस। 15पहिले इ सहर क नाउँ किर्यतर्बा रहा। सहर क नाउँ अनाकी लोगन क सब त महान अर्बा नाउँ क मनई क नाउँ पइ रखा गवा रहा।

एकरे पाछे, उ देस में सान्ति रही।

यहूदा बरे प्रदेस

15 यहूदा क जउन प्रदेस दीन्ह गवा उ ओकरे सारे कबिलन क बीच में बाँटा। उ प्रदेस एदोम क छेत्र तलक अउर सीन क रेगिस्तान में एँका सबइ त दक्खिन छेत्र तलक फइला रहा। 2यहूदा क प्रदेस क दक्खिनी सीमा मृत सागर क दक्खिनी छोर स सुरु होत रही। 3इ सीमा बिच्छू दर्ग क दक्खिन तलक जात रही अउर सीन तलक बढ़ी भइ रही। तब इ सीमा कादेसबर्ने क दक्खिन तलक लगातार गइ रही। इ सीमा हेब्रोन क आगे अद्वार तलक चलत चली गइ रही। अद्वार स चउहद्दी मुडत रही अउर कर्काआ तलक गइ रही। 4इ सीमा अम्मोन स होत भइ मिस्र क नहर तलक लगातार चलिके अन्त में भूमध्य सागर तलक पहुँचत रही। उ प्रदेस, प्रदेस क दक्खिनी सीमा बनावत रही।

5उ प्रदेस क पूर्बी सीमा मृत सागर (खारा समुद्र) क किनारे स सुरु होत रही जहाँ पइ यरदन नदी समुद्र में गिरत रही।

उत्तरी सीमा उ छेत्र स सुरु होत रही जहाँ यरदन नदी मृत सागर में गिरत रही। 6तब उत्तरी सीमा बेथोग्ला स होत

भइ गएन अउर बोहन चट्टान (बोहन रूबेन क पूत रहा।) होत भइ उत्तरी बेतराबा तलक चली गइ रही। 7तब उत्तरी सीमा आकोर क घाटी स होइके दबीर तलक गइ रही। हुआँ सीमा उत्तर क मुड़ि जात रही अउर गिलगाल तलक जात रही। गिलगाल उ सड़क क पार अहइ जउन अदुम्मीम पहाड़े स होइके जात ह जउन कि घाटी क दक्खिन कईँती अहइ। इ सीमा एनसेमेस पानी क बहाव क संग लगातार गइ रही। एन रोगेल पइ सीमा खतम रही। 8तब इ सीमा यबूसी सहर क दक्खिन कईँती स बेन हिन्नोम घाटी स होइके गइ रही। उ यबूसी सहर क यरूसलेम कहा जात रहा। (उ जगह पइ सीमा हिन्नोम घाटी क उलरी छोर प रही।) 9तब सीमा पहाड़ क चोटी पइ स नेप्तोह क पानी क झील तलक जात रही। ओकरे पाछे सीमा एप्रोन पहाड़े क निचके क सहरन तलक जात रही। उ जगह पइ सीमा मुडत रही अउर बाला क जात रही जो कि किर्यत-यारीम अहइ। 10बाला स सीमा पच्छिम कईँती मुडी अउर सेईर क पहाड़ी देस क गइ। यारीम पहाड़े क उत्तर क छोर तलक सीमा चलत रही (एका कासालोन भी कहा जात ह) अउर बेतसमेस तलक गइ। हुआँ स सीमा तिम्ना क पार गइ। 11तब इकरोन क उत्तरी छोर में क गइ। तब उ जगह स सीमा सिक्करोन क मुडी अउर बाला पर्वत क पार गइ। इ सीमा लगातार यब्वेल तलक गइ अउर भूमध्य सागर पइ खतम भइ। 12भूमध्य सागर यहूदा प्रदेस क पच्छिमी सीमा पइ रहा। इ सबइ यहूदा क प्रदेस सीमा रहेन। यहूदा क परिवार समूह इ प्रदेस में रहत रहा।

13यहोबा यहोसू क आदेस दिहे रहा कि उ यपुने क पूत कालेब क यहूदा क भुईया में स हींसा देइ। एँह बरे यहोसू कालेब क उ प्रदेस दिहस जेकरे बरे परमेस्सर आदेस दिहे रहा। यहोसू ओका किर्यत-अर्बा क सहर दिहस (जउन हेब्रोन भी कहा जात रहा)। (अर्बा अनाक क बाप रहा।) 14कालेब तीन अनाक परिवारन क हेब्रोन, जहाँ उ पचे रहत रहेन, छोड़ देइ क मजबूर किहस। उ सबइ परिवार रहेन: सेसाइ, अहीमन अउ तल्मै। उ सबइ अनाक क परिवार क रहेन। 15कालेब दबीर में रहइवाले लोगन स लड़ा। (पुराने जमाना में दबीर भी किर्यत्सेपेर कहा जात रहा।) 16कालेब कहेस, “कउनो मनई जउन किर्यत्सेपेर पइ हमला करी अउर उ सहर क जीत लइ, उहइ मोर बिटिया अकास स बियाह कइ सकी। इ ओकरे बरे एक भेंट होब्य।”

17कालेब क भाई कनजी क पूत ओत्नीएल उ सहर क हराएस। एँह बरे कालेब आपन बिटिया अकसा क ओका आपन पत्नी होइ बरे कन्यादान दिहस। 18ओत्नीएल अकसा स कहेस कि उ आपन बाप स कछू जियादा भुईया माँगइ। अकसा आपन बाप क लगे गइ। जब उ आपन गदहा स उतरी तउ ओकर बाप ओहसे पूछेस, “तू का चाहति अहा?”

19अकसा जवाब दिहस, “मई आपन एक ठु आसीबीद पावइ चाहत हउँ। मई पानीवाली भुईया चाहत हउँ जउन भुईया आप मोका जेगेब में दिहा ह, उ बहोत झुरान अहइ, एँह बरे मोका अइसी भुईया द्या जेहमाँ पानी क सोता होई।” एँह बरे कालेब ओका भुईया क ऊपरी अउ खाले क हींसा में सोतन क साथ भुईया दिहस।

20यहूदा क परिवार समूह उ भुईया पाएस जेका परमेस्सर ओका देइ क वचन दिहे रहा। हर एक कबीला समूह भुईया क हींसा पाएस। 21यहूदा क कबीला दक्खिन में सबइ सहरन क पाएस। इ सबइ सहर एदोम क प्रदेस क निचके रहेन। इ सबइ रहेन:

कबसेल, एदेर, यागूर, 22कीना, दीमोना, अदादा, 23केदेस, हासोर, यित्ना, 24जीप, तेलम, बालोत, 25हासोर्हदत्ता, किर्य्योत-हेन्नोन (हासोर भी कहा जात रहा), 26अमाम, समा, मोलादा, 27हसर्गद्दा, हेसमोन, बेत्पालेत, 28 हसर्सूआल, बेर्सेबा, बिज्योत्या, 29बाला, इथ्यीम, एसेम, 30एलतोलद, कसील, होर्मी, 31सिकलग, मदमन्ना, सनसन्ना, 32लबाओत, सिल्हीम ऐन अउ रिम्मोन। सब मिलाइके उन्तीस सहर अउर ओनके सबहिं खेत रहेन।

33पच्छिमी पहाड़ियन क तलहटी क सहरन: एसताओल, सोरा, असना, 34जानोह, एनगन्नीम, तप्पूह, एनाम, 35यर्मूत, अदुल्लाम, सोको, अजेका, 36सारैम, अदीतैम अउ गदेरा (गदेरोतैम भी कहा जात रहा)। सब मिलाइके हुआँ चोचह सहर अउ ओनकर सारे खेत रहेन।

37सनान, हदासा, मिगदलगाद, 38दिलान, मिस्पे, योक्तेल, 39लाकीस, बोस्कत, एग्लोन, 40कब्बोन, लहमास, कितलीस, 41गोदेरेत, बेतदागोन, नामा, अउर मक्केदा, सब मिलाइके हुआँ सोलह सहर अउर ओनकर सारा खेत रहेन।

42लिब्ना, ऐतेर, आसान, 43यिप्ताह, असना, नसीब, 44कीला, अकजीब अउ मारेसा। सब मिलाइके इ सबइ नौ सहर अउर ओनकर सारा खेत रहेन।

45एक्रोन अउर एँकर चारिहुँ कईँती क गाँव, अउर खेतन। सहर अउ निचके क नान्ह सहर सारा खेतन क संग पाएन। 46एक्रोन क पच्छिम क छेत्र, सारा खेत अउर असदोद क निअरे क सहरन। 47असदोद क चारिहुँ कईँती क छेत्र अउर हुआँ क नान्ह नगर जउन कि यहूदा प्रदेस क हींसा रहेन, एँकर संग चारिहुँ ओर क खेतन अउर सहरन समेत। गाजा क सबइ कईँती क छेत्र ओनकर प्रदेस मिस्त्र क नदी अउर आगे लगातार भूमध्य सागर क किनारे तलक फइला रहा।

48पहाड़ी देस सहरन: सामीर, यत्तीर, सोको, 49दन्ना, किर्यत्सन्ना (एका दबीर भी कहत रहेन), 50अनाब, एसतमो, आनीम, 51गोसेन, होलोन अउर गीलो सब मिलाइके ग्यारह सहर अउर ओनकर खेत रहेन।

52अराब, दूमा, एसान, 53आनीम, बेत्तप्पूह, अपेका, 54हुमता, किर्यतर्बा (हेब्रोन) अउर सीओर इ सबइ नौ सहर अउर एनकर सारा खेत रहेन।

55माओन, कर्मेल, जीप, यूता, 56यिज्रेल, योकदाम, जानोह, 57कैन, गिबा अउर तिम्जा। इ सबहिं दस सहर अउर ओनकर सारा खेत रहेन।

58हलहूल, बेतसूर, गदोर, 59मरात, बेतनोत अउर एलतकोन सबहिं छः सहर अउर ओनकर सारा खेत रहेन।

60रब्बा अउर किर्यत-बाल, जेका किर्यत-यारीम भी कहा जात रहा। 61यहूदा क लोगन क रेगस्तान में सहर दीन्ह ग रहेन। ओन सहरन क सूची इ अहइ। बेतराबा, मिददीन, सकाका, 62निबसान, लवण सहर अउर एनगदी। सब मिलाइके छः सहर अउर ओनकर सारा खेत रहेन।

63 यहूदा क फउज यरूसलेम में बसइयन यबूसी लोगन क जबरदस्ती बाहेर करइ में समरथ नाहीं भइ। एह बरे अब तलक यबूसी लोग यरूसलेम में यहूदा लोगन क बचि रहत हीं।

एप्रैम अउ मनस्से बरे प्रदेस

16 इ उ प्रदेस अहइ जेका यूसुफ क परिवार पाएस। इ प्रदेस यरीहो क लगे यरदन नदी स सुरु भवा अउ आगे पूरब में यरीहो पानी तलक रहा। तउ इ प्रदेस यरीहो स बतेल क रेगिस्तानी पहाड़ी तलक चली गइ। 2सीमा लगातार बतेल स लूज तलक अउर फुन अतारोत पइ ऐरेकी सीमा तलक चली गइ रही। 3तब इ चउहद्दी पच्छिम में यपलेती लोगन क चउहद्दी तलक चली गइ। इ चउहद्दी लगातार खाले बेथोरोन तलक चली गइ रही। इ चउहद्दी गोजेर तलक गइ अउर समुदर तलक चलतइ चलत गइ।

4इ तरह मनसे अउर एप्रैम आपन प्रदेस पाएस। (मनस्से अउ एप्रैम यूसुफ क पूत रहेन।)

5इ उ प्रदेस अहइ जेका एप्रैम क कबिलन क दीन्ह गवा: ओनकर पूरबी चउहद्दी ऊपरी बेथोरोन क निअरे अत्रोतदार पइ सुरु भइ। 6अउर इ हुआँ स सागर तलक जात रही। चउहद्दी उत्तर में मिकमतात क छोड़ कर तानतसीलो क मुड़ी अउ लगातार पूरब कइँती यानोह तलक चली गइ रही। 7तब चउहद्दी यानोह स अतारोथ अउ नारा तलक चली गइ। इ चउहद्दी लगातार चलत भइ यरीहो छुअत ह अउर यरदन नदी पइ खतम होइ जात ह। 8इ चउहद्दी तप्पूह स होत भइ पच्छिम कइँती कानाह नाला क जात ह अउर सागर पइ खतम होइ जात ह। इ उ प्रदेस अहइ जउन एप्रैम क लोगन क ओकरे परिवार समूह क अनुसार दीन्ह गवा रहा। 9एप्रैम क बहोत स चउहद्दी क सहर असल में मनस्से क चउहद्दी में रहेन मुला एप्रैम क लोगन ओन सहरन अउर आपन खेतन क पाएन। 10मुला एप्रैम लोग कनानी लोगन क गोजेर सहर छोड़इ क मजबूर करइ में समर्थ नाहीं होइ सकेन। एह बरे कनानी लोग अब तलक एप्रैमी लोगन क बीच रहत हीं। मुला कनानी लोग एप्रैमी लोगन क दास क रूप में रहत रहेन।*

17 तब मनस्से क परिवार समूह क भुइँया दीन्ह गइ। मनस्से यूसुफ क पहिला पूत रहा। मनस्से क पहिला पूत माकीर रहा जउन गिलाद क बाप* रहा। माकीर महान जोधा रहा, एह बरे गिलाद अउ बासान माकीर क परिवार क दीन्ह गएन। 2मनस्से क परिवार समूह क दूसर कबिलन क भी भुइँया दइ दीन्ह गइ। उ सबइ कबिलन अबीएजेर, हेलेक, अस्त्रीएल, सेकेम, हेपेर अउ समीदा रहेन। इ सबहि मनस्से क दूसर पूत रहेन, जउन यूसुफ क पूत रहा।

3सलोफाद हेपेर क पूत रहा। हेपेर गिलाद क पूत रहा। गिलाद माकीर क पूत रहा अउर माकीर मनस्से क पूत रहा। मुला सलोफाद क कउनो पूत नाहीं रहा। ओकर पाँच

बिटियन रहिन। बिटियन क नाउँ महला, नोआ, होग्ला, मिल्का अउर तिसा रहेन। 4बिटियन याजक एलीआज़ार अउर नून क पूत यहोसू क इलावा सबहि प्रमुखन क लगे गइन। बिटियन कहेन, “यहोवा मूसा स निर्देस दिहस कि उ हमका वइसेन ही भुइँया देई जइसेन हमार भाईयन क दीन्ह जात हीं।” एह बरे एलीआज़ार, यहोवा क हुकुम मानत भए एन बिटियन क वाइसेन ही भुइँया दिहेस जइसेन ओनके चाचा लोगन क मिली रही।

5इ तरह मनस्से क परिवार क लगे यरदन नदी क पच्छिम में भुइँया क दस छेत्र रहेन अउर यरदन नदी क दुसरी कइँती दुइ तु दूसर छेत्र गिलाद अउ बासान रहेन। 6मनस्से क पोतियन क वइसेन ही भुइँया दीन्ह गइ जइसेन मनस्से क दूसर बेटवन सन्तानन क दीन्ह गइ रही। गिलाद प्रदेस मनस्से क सेस परिवार क दीन्ह गवा।

7मनस्से क भुइँया आसेर अउ मिकमतात क छेत्र क बीच रही। इ सकेम क निअरे अहइ। एकर चउहद्दी एनतप्पूह स दक्खिन तलक जात रही। 8तप्पूह क भुइँया मनस्से क रही मुला तप्पूह सहर ओकर नाहीं रहा। तप्पूह सहर जउन कि मनस्से क प्रदेस क चउहद्दी पइ रहा उ एप्रैम क बेटवन स आबाद रहा। 9मनस्से क चउहद्दी काना नाले क दक्खिन में रही। मनस्से क इ छेत्र क सहर एप्रैम क रहेन। मनस्से क चउहद्दी नदी क उत्तर में रही अउर इ पच्छिम में लगातार भूमध्य सागर तलक चली गइ रही। 10दक्खिन क भुइँया एप्रैम क रही अउर उत्तर क भुइँया मनस्से क रही। भूमध्य सागर पच्छिम क चउहद्दी बनावत रहा। इ चउहद्दी उत्तर में आसेर क प्रदेस क छुअत रही अउ पूरब में इस्साकार क प्रदेस क।

11इस्साकार अउ आसेर क छेत्र क बेतसान अउ एकर चारिहुँ कइँती क गाँव उ यिबलाम अउ एकर चारिहुँ कइँती क गाँव मनस्से क रहेन। मनस्से क कब्जा में दोर अउ एकर चारिहुँ कइँती क गाँव अउ एनदोर अउर एकर चारिहुँ कइँती क गाँव भी रहेन। नापात क तीन तु सहरन समेत तानाक अउर ओकर चारिहुँ कइँती क गाँव भी मनस्से क कब्जा में रहा। 12मनस्से क लोग ओन सहरन क नाहीं हराइ सका रहेन। एह बरे कनानी लोग हुआँ रहत रहेन। 13मुला इस्त्राएल क लोग सक्तीसाली भएन। जबहि अइसा भवा तउ उ पचे कनान क लोगन क गुलामी में जाइ बरे मनबूर किहेन। मुला उ पचे कनानी लोगन क उ भुइँया तजि देइ बरे मजबूर नाहीं किहेस।

14यूसुफ क परिवार समूहन यहोसू स बातन किहेन अउर कहेन, “तू भुइँया क हमका एक हीसा दिहया ह। मुला हम बहोत स लोग अहई। तू हम लोगन क उ देस क एक हीसा ही काहे दिहया जबकि यहोवा हम लोगन क आसीर्बाद दिहस?”

15अउर यहोसू ओनका जवाब दिहस, “अगर तू लोग गनती में जियादा हवा तउ पहाड़ी प्रदेस क जंगलन में ऊपर चढ़ा अउर हुआँ रहइ बरे अपन जगह बनाव। इ प्रदेस परिज्जन अउ रपाई लोगन क अहइ। अगर एप्रैम क पहाड़ी प्रदेस तू लोगन क जरूरत स छोटवार अहइ तउ उ भुइँया क लइ ल्या।”

कनानी लोग ... रहत हीं यानी जब यहोसू सर्ग लिखा गवा, कनानी लोग गोजेर में तब तलक रहत रहेन।

गिलाद क बाप “या गिलाद छेत्र क प्रमुख।”

16यूसुफ क लोग कहेन, “इ फुरइ अहइ कि एप्रैम क पहाड़ी प्रदेस हम लोगन बरे काफी नाहीं अहइ। मुला इ प्रदेस जहाँ कनानी लोग रहत हीं खतस्नाक बाटइ। उ सबइ कुसल जोधा अउ ओनके लगे लोहा क रथ अहइ। अउर उ सबइ थिज्रेल क घाटी अउर एकर चारिहुँ कइँती क गाँव क इलावा बेतसान क छेत्र पइ दबदबा रखत हीं।”

17तब यहोसू यूसुफ, एप्रैम अउर मनस्से क लोगन स कहेस, “मुला तू लोगन क गनती बहोतइ जियादा अहइ। अउर तू लोग बड़की ताकत धरत ह। तू लोगन क जियादा भुइँया मिलइ चाही। 18तू लोगन क पहाड़ी प्रदेस लेइ क होइ। इ जंगल अहइ, मुला तू लोग बृच्छन क काटि सकत ह अउर रहइ जोगग नीक जगह बनाइ सकत ह। इ सारा पचन्क होइ। तू लोग कनानी लोगन क उ प्रदेस क तीज देइ बरे मजबूर करब्या। तू लोग ओनका सक्तीसाली रथ क होत भए भी जउन ओनका सक्ती प्रदान करत ह हराइ देब्या।”

बचे भए प्रदेस क बँटवारा

18 इस्राएल क सबहिँ लोग सीलो नाउँ क ठउर पइ बटुर गएन। उ ठउरे पइ उ पचे मिलापवाला तम्बू खड़ा किहन। इस्राएल क लोग उ प्रदेस क सबहिँ दुस्मन क हराए रहेन अउर उ प्रदेस ओनके अधिकार में रहेन। 2मुला उ समइ भी इस्राएल क सात परिवार समूह अइसेन रहेन, जेनका परमेस्सर क जरिये वचन दीन्ह जाइ पइ भी ओनका दीन्ह गइ भुइँया नाहीं मिली रही।

3एँह बरे यहोसू इस्राएल क लोगन स कहेस, “तू लोग आपन प्रदेस लेइ मैं ऐतनी देर काहे जोहत अहा? यहोवा, तू पचन्क परमेस्सर इ प्रदेस तू पचन्क दिहे अहइ। 4एँह बरे तोहरे सबन्क हर एक परिवार समूह क तीन मनई चुनइ चाही? मइँ ओन मनइयान क ओन प्रदेसन क जाँच बरे पठउब। उ सबइ उ पूरे प्रदेस स होइ क जाब अउर उ प्रदेस क विवरन तइयार करिहीं तब उ सबइ मोरे लगे लउटिहीं। 5उ पचे देस क सात ठु हींसा मैं बाँटि देइहीं। यहूदा क लोग आपन प्रदेस दक्खिन मैं रखिहीं। यूसुफ क लोग आपन प्रदेस उत्तर मैं रखिहीं। 6मुला तू लोगन क भुइँया क उल्लेख करत भवा विवरण तइयार करइ चाही अउ प्रदेस क सात ठु हींसन मैं बाँटि देइ चाही। विवरण मोरे लगे लिआवा। अउर मइँ हिआँ यहोवा हमार परमेस्सर क मौजूदगी मैं तोहार बरे पाँसा (लोटेरी) डालब। 7मुला लेवी परिवार समूह एँन प्रदेसन क कउनो हींसा नाहीं पइहीं। उ सबइ याजक अहइँ अउर ओनकर कारज यहोवा क सेवा करब अहइ। गाद अउर रूबेन क परिवार समूह अउ मनस्से क आधा क परिवार समूहन क लोग पहले वचन क अनुसार दीन्ह गवा आपन प्रदेस पाइ चुका अहइँ। इ सबइ प्रदेस यरदन नदी क पूरब मैं अहइँ। यहोवा क सेवक मूसा उ प्रदेस क पहिले ही दइ दिहे रहा।”

8एँह बरे चुने भए मनई उ भुइँया क लखइ अउ ओकर नक्सा बनावइ बरे चला गएन। यहोसू ओनसे कहेस, “जा, अउर उ प्रदेस क जाँच करा अउर ओकर नक्सा तइयार करा। तब मोरे लगे लउटि आवा। उ समइ मइँ यहोवा स

कहबउँ कि जउन देस तू पचन्क मिली ओका चुनइ मैं उ पचे मोर मदद करइँ।”

9एँह बरे ओन मनसेधुअन उ जगह तजेन अउर उ देस मैं उ पचे चला गएन। उ पचे देस क जाँच किहेन अउर यहोसू बरे नक्सा तइयार किहेन। उ पचे हर सहर क जाँच किहेन अउर पाएन कि प्रदेस क सात ठु हींसा अहइँ। उ पचे आपन नकसा क तइयार किहेन अउर यहोसू क लगे गएन। यहोसू तबहुँ सीलो क डेरा मैं रहा। 10उ समइ यहोसू यहोवा स मदद माँगेस। यहोसू हर एक परिवार समूह क देइ बरे एक ठु प्रदेस चुनेस। यहोसू प्रदेस क बाँटिस अउर हर एक परिवार समूह क ओकरे हींसा क प्रदेस दिहस।

बिन्यामीन बरे प्रदेस

11तब बिन्यामीन क परिवार समूह अउर ओनकइ कबीलन बरे पाँसा डावा गवा रहा अउर पाँसा यहोदा अउर यूसुफ क परिवार समूहन क भुइँया क बीच पड़ेन। 12एँकर उत्तरी चउहद्दी यरदन नदी स सुरु भइ। इ चउहद्दी यरीहो क उत्तरी छेरे स गइ रही। तब इ चउहद्दी पच्छिम क पहाड़ी प्रदेस मैं गइ रही। इ चउहद्दी लगातार बेतावेन क ठीक पूरबी ढलान तलक रही। 13तब इ चउहद्दी लूज़ (यानी बेतेल) क दक्खिनी ढलान तलक गइ। फिन इ चउहद्दी अत्रोटद्वार तलक खाले गइ। अत्रोटद्वार खाले बेथोरोन क दक्खिनी पहाड़ी क ढलान पइ अहइ। 14चउहद्दी दक्खिन कइँती मड़ी अउर बैथ-हेरोन क लगे उ पहाड़ी क पच्छिमी कइँती क निचके स गइ। इ चउहद्दी आगे किर्यत बाल जउन किर्यत-यारीम भी कहलावत ह तलक गएन। इ एक सहर रही जहाँ यहूदा क लोग रहत रहेन। इ पच्छिमी चउहद्दी रही।

15दक्खिन क चउहद्दी किर्यतयारीम स सुरु भइ अउर नेप्तोह क पानी क चसमा तलक गइ। 16तब चउहद्दी हिन्नोम क घाटी क निचके पहाड़ी क तलहटी मैं गइ। इ रपाईम घाटी क उत्तरी छोर रहा। इ चउहद्दी यबूसी सहर क ठीक दक्खिन हिन्नोम घाटी मैं चलत भइ चली गइ। तब चउहद्दी एनरोगेल तलक चली गइ। 17हुआँ, चउहद्दी उत्तर कइँती मुड़ी अउर एन सेमेस क गइ। इ चउहद्दी लगातार गलीलोट तलक जात ह। (गलीलोट, पहाड़न मैं अदुम्मीम दर्रे क निअरे अहइ।) इ चउहद्दी उ बड़की चट्टान तलक गइ जेकर नाउँ रूबेन क पूत, बोहन बरे धरा गवा रहा। 18इ चउहद्दी बेतअरबा क उत्तरी भाग तलक लगातार चली गइ। 19तब इ बेथोगला क उत्तरी भाग क जाइके, लवण सागर क उत्तरी तट पइ खतम भइ। इ उहइ जगह अहइ जहाँ यरदन नदी समुद्र मैं गिरत ह। इ दक्खिनी चउहद्दी रही।

20पूरब कइँती यरदन नदी क चउहद्दी रही। इ तरह इ भुइँया रही जउन बिन्यामीन क परिवार समूह क दीन्ह गइ। इ सबइ चारिहुँ कइँती क चउहद्दी रहीन। 21बिन्यामीन क हर एक परिवार समूह क, इ तरह, इ भुइँया मिली। ओनके कब्जा मैं इ सबइ सहर रहेन। यरीहो, बेथोगला, एमेक्कसीस, 22बेतशाबा, समारैम, बेतेल, 23अव्वीम, पारा, ओप्रा, 24कपरम्मोनी,

ओन्नी अउ गोबा। इ सबइ बारहु सहर, उस छोटके छेत्र में, ओनके आसपास खेतन क साथे रहेन।

25बिन्ध्यामीन क परिवार समूह क लगे गिबोन, रामाबेरोत, 26मिस्पा, कपीरा, मोसा, 27रेकेम, थिर्पेल, तरला, 28सेला, एलेप, यबूस सहर (यरुसलेम), गिबत अउ किर्यत-यरीम सहर भी रहेन। इ सबइ चउदह सहर, उ छोटके छेत्र में ओनके आसपास क खेतन क साथे रहेन। इ सबइ पहाँटा बिन्ध्यामीन क परिवार समूह पाए रहा।

सिमोन बरे प्रदेस

19 सिमोन क परिवार बरे दूसर पाँसा डावा गवा रहा। जउन ओनका मिली, यहूदा क अधिकार-छेत्र क भीतर रही। 2इ उ भुइँया क विवरण रही जउन ओनका मिली: बेसेबा जउन सेबा भी कहलावत ह। मोलादा, 3हसर्सूआल, बाला, एसेम, 4एलन्तोल्द, बतूल, होर्मा, 5सिकलग, बेत्मर्काबोत, हसर्सूसा, 6बेतलबाओत अउ सारुहने, इ सबइ तेरह सहर अउर ओनकर सारा खेत सिमोन क रहेन। 7ओनका ऐन, रिम्मोन, एतेर अउ आसान सहर भी एकर खेतन क साथ पाए रहेन। 8उ पचे उ सबइ सारा खेत सहसन क साथे पाएन जउन बालत्वेर तलक फइला रहेन। (इ नेगव छेत्र में रामा ही अहइ।) इ तरह इ उ प्रदेस रहा, जउन सिमोनी लोगन क परिवार समूह क दीन्ह गवा। हर एक इ भुइँया क पाएस। 9सिमोनी लोगन क भुइँया यहूदा क प्रदेस क भाग स लीन्ह गइ रही। यहूदा क लगे ओन लोगन क जरुरत स जियादा भुइँया रही। एह बरे सिमोनी लोगन क ओनकी भुइँया क हीसा मिला।

जबूलून बरे प्रदेस

10जबूलून क परिवार समूह अउर ओकरे कबीलन बरे तीसर पाँसा डावा गवा रहा। जबूलून क प्रदेस सारीद तलक जात रही। 11फिन उ पच्छिम में दब्बेसेत स होत भइ मरला क छेत्र क निचके तलक पहुँचत रहा। तब इ चउहद्दी संकरी घाटी स होत भए योकनाम क छेत्र तलक जात रही। 12तब इ चउहद्दी पूरब कइँती मुड़ी रही। इ सारीद स किसलोलताबोर क छेत्र तलक पहुँचत रही। तब इ चउहद्दी दाबरत अउ यापी तलक चलत गइ रही। 13तब चउहद्दी पूरब में गथेपेर अउर इत्कासीन तलक लगातार रही। इ चउहद्दी रिम्मोन पइ खतम भइ। तब चउहद्दी मुड़ी अउर नेआ तलक गइ। 14नेआ पइ फिन चउहद्दी मुड़ी अउ उत्तर कइँती गइ। इ चउहद्दी हन्नातोन तलक पहुँची अउर लगातार यिप्तहेल क घाटी तलक गइ। 15इ चउहद्दी क भीतर कतात, नहलाल, सिप्रोन यिदला अउर बेतलेहेम सहर रहेन। सब मिलाइके इ सबइ बारह सहर आपन खेतन क साथे रहेन।

16एह बरे इ सबइ सहर अउ छेत्र अहइँ जउन जबूलून क कबीलन क दीन्ह गएन।

इस्साकार बरे प्रदेस

17चउथा पाँसा इस्साकार क परिवार समूह क कबिलन बरे डावा गवा रहा। 18उ परिवार समूह क जउन भुइँया दीन्ह

गइ रही उ इ अहइ: यिज्रेल, कसुल्लोत, सूनेम 19हपारैम, सीओन, अनाहरत, 20रब्बीत, किस्योन्, एबेस, 21रेमेत, एनगन्नीम, एन हददा अउर बेतपस्सेस।

22ओनकर प्रदेस क चउहद्दी ताबोरसहसूसूसा अउर बेतसेमेस क छुअत रही। इ चउहद्दी यरदन छेत्र पइ खतम होत रही। सब मिलाइके सोहाह सहर अउर ओनकर खेत रहेन। 23इ सबइ सहर अउर कस्बा इस्साकार परिवार समूह अउर ओनकइ कबीलन क दीन्ह गएन प्रदेस क हीस रहेन।

आसेर बरे प्रदेस

24पाँचवाँ पाँसा आसेर क परिवार समूह अउर ओनकइ कबीलन बरे डावा गवा रहेन। 25उ परिवार समूह क जउन भुइँया दीन्ह गइ उ इ अहइ: हेल्कत, हली, बेतेन, अच्छाप, 26अलाम्मेल्लेक, अमाद अउ मिसाल।

पच्छिमी चउहद्दी लगातार कर्मेल पहाड़ अउ सीहोलिब्नात तलक रही। 27तब चउहद्दी पूरब कइँती मुड़ी। इ चउहद्दी बेतदागोन तलक गइ। इ चउहद्दी जबूलून अउ यिप्तहेल क घाटी क छुअत रही। तब इ चउहद्दी बेतेमेक अउ नीएल क उत्तर क गइ। इ चउहद्दी काबुल क उत्तर स गइ रही। 28तब इ चउहद्दी एग्रोन, र्होब अउर हम्मोन होत भइ काना तलक गइ रही। इ प्रदेस लगातार एक सक्तीसाली सहर सिदोन तलक गइ रही। 29इ चउहद्दी रामा कइँती मुड़ी अउर फुन किलाबन्द सहर सूर तलक गइ। तब फुन मुड़ी अउर होसा तलक गइ। इ चउहद्दी अकज़ीब, 30उम्मा, अपेक अउर र्होब क छेत्र में समुदर पइ खतम होत रही।

सब मिलाइके हुआँ बाईस सहर अउ ओनकर खेत रहेन। 31इ सबइ सहर अउ ओनके खेत आसेर परिवार समूह क दीन्ह गए भुइँया क हीसा रहेन। उ परिवार समूह क हर एक कबिला इ भुइँया क कछू हीसा पाएस।

नप्ताली बरे प्रदेस

32छठा पाँसा नप्ताली क परिवार समूह अउर ओनकर कबीलन बरे डावा गवा रहेन। 33ओनकर प्रदेस क चउहद्दी सानन्नीम क छेत्र में बिसाल वृच्छ स सुरू भइ। इ हेलेप क निअरे रहा। तब इ चउहद्दी अदानीमेकेब अउ यबनेल स होइके गइ। इ चउहद्दी लक्कूम पइ खतम भइ। 34तब इ चउहद्दी पच्छिम क अजनोत्ताबोर होइके गइ। इ चउहद्दी हुक्कोक पइ खतम भइ। इ चउहद्दी दक्खिन क जबूलून छेत्र तलक गइ। इ चउहद्दी पच्छिम में आसेर क छेत्र तलक पहुँचत रही। इ चउहद्दी पूरब में यरदन नदी पइ यहूदा क जात रही। 35इ चउहद्दी क भीतर कछू बहोत सक्तीसाली सहर रहेन। इ सबइ सहर सिद्दीम, सेर, हम्मत, रक्कत, किन्नेरेत, 36अदामा, रामा, हासोर, 37केदेस, एदेइ, अन्हासेर, 38यिरोन, मिगदलेल, होरेम, बेतनात अउ बेतसेमेस रहेन, सब मिलाइके हुआँ उन्नीस सहर अउर ओनकर खेत रहेन।

39इ सबइ सहर अउर ओनकर चारिहुँ कइँती क कस्बन उ प्रदेस क हीसा रहेन, जउन नप्ताली क परिवार समूह क ओनकइ कबीलन क अनुसार दीन्ह ग रहेन।

दान बरे प्रदेस

40तब सताएँ पाँसा दान क परिवार समूह अउर ओनकर कबीलन बरे डावा गवा रहेन। 41ओनका जउन कछू प्रदेस दीन्ह गवा उ इ अहइ: सोरा, एस्ताओल, ईरसेमेस, 42सालब्बीन, अय्यालोन, यितला, 43एलोन, तिम्ना, एक्रोन, 44एलतके, गिब्बतोन, बालात, 45यहूद, बेनेबराक, गत्रिम्मोन, 46मेयर्कोन, रक्कोन अउ यापो क निचके क छेत्र। 47मुला दान क लोगन क आपन प्रदेस लेइ मँ परेसानी उठावइ क पड़ी। हुआँ सक्तीवाला दुस्मन रहेन अउर दान क लोग ओनका आसानी स हराइ नाहीं सकत रहेन। एँह बरे दान क लोग गएन अउर लेसेम क खिलाफ लड़ेन। उ पचे लेसेम क हराएन अउ जउन लोग हुआँ रहत रहेन, ओनका मार डाएन। एँह बरे दान क लोग लेसेम सहर मँ रहेन। उ पचे ओकर नाउँ बदलिके दान कइ दिहन काहेकि इ नाउँ ओनके परिवार समूह क पुरखा क रहा। 48इ सबइ सबहिँ सहरन अउर खेत उ भुइँया मँ रहेन जउन दान क परिवार समूह क ओनकर कबीलन क अनुसार दीन्ह ग रहेन।

यहोसू बरे प्रदेस

49इ तरह प्रदेसन क बाँटवारा करब अउर अलग अलग परिवार समूहन क ओनका देब पूरा किहन। तब इस्राएल क सब लोग नून क पूत यहोसू क भी कछू प्रदेस देइ क निहचय किहन। 50यहोवा हुकुम दिहस कि ओका उ भुइँया मिलइ। एँह बरे उ पचे एप्रैम क पहाड़ी प्रदेस मँ यहोसू क विमन्त्सेरह सहर दिहन। इहइ उ सहर रहा, जेकरे बरे यहोसू कहे रहा कि मईँ ओका चाहत हउँ। यहोसू उ सहर क फुन: बनाएस अउर उ ओहमाँ रहइ लाग।

51इ तरह इ सबइ प्रदेस इस्राएल क अलग अलग परिवार समूहन क दीन्ह गएन। याजक एलीआजार, नून क पूत यहोसू अउ हर एक परिवार समूह क नेता लोग सिलोह मँ मिलापवाला तम्बू क दुआर पइ यहोवा क मौजूदगी मँ बटुरा रहेन। इ तरह उ पचे प्रदेस क बाँटवारा पूरा कइ लिहन।

सुरच्छा क सहर

20 तब यहोवा यहोसू स कहेस: 2“मईँ मूसा क उपयोग तू लोगन क हुकुम देइ बरे कियेउँ ह। मूसा तू लोगन स सुरच्छा क विसेस सहर बनवइ बरे कहे रहा। तउ सुरच्छा बरे ओन सहरन क चुनाव करा। 3अगर कउनो मनई कउनो मनई क मार डावत ह, मुला अइसा संजोग क कारण होत ह अउर ओकर इरादा ओका मार डावइ क नाहीं होत तउ उ मरे मनई क ओन रिस्तेदारन स जउन बदला लेइ बरे ओका मारि डावइ चाहत हीँ, आत्मरच्छा बरे सुरच्छा नगर मँ सरण लइ सकत ह।

4“उ मरा मनई क इ करइ चाही। जब उ पराइ अउर ओन सहरन मँ कउनो एक मँ पहुँचइ तउ ओकर सहर दुआर पइ रुकइ चाही। ओका सहर दुआरे पइ खड़ा रहइ चाही अउर नगर प्रमुखन क बतावइ चाही कि का घटा अहइ। तब नगर प्रमुख ओका सहर मँ प्रवेस करइ दइ सकत हीँ। उ सबइ ओका आपन बीच मँ रहइ क जगहिया

देइहीँ। 5मुला उ मनई जउन ओकर पाछा करत अहइ उ सहर तलक ओकर पाछा कइ सकत ह। अगर अइसा होत ह तउ नगर प्रमुखन क ओका यो ही नाहीं तजि देइ चाही, बल्कि ओनका उ मनई क रच्छा करइ चाही जउन ओनके लगे सुरच्छा बरे आवा अहइ। उ सबइ उ मनई क रच्छा एँह बरे करिहीँ कि उ जेका मार डाएस ह, ओका मारि डावइ क ओकर इरादा नाहीं रहा। इ संजोग क कारण होइ गवा। उ कोहान नाहीं रहा अउर उ मनई क मारइ क निहचय नाहीं किये रहा। इ कछू अइसा रहा, जउन होइ ही गवा। 6उ मनई क तब तलक सहर मँ रहइ चाही जब तलक उ सहर क निआव क कचहरी क जरिये ओकरे मोकदमा क निर्णय नाहीं होइ जात अउर ओका तब तलक उहइ सहर मँ रहइ चाही जब तलक महा याजक नाहीं मर जात। तब उ आपन घर मँ उ सहर मँ लउटि सकत ह, जहाँ स उ भागत भवा आवा रहा।”

7एँह बरे इस्राएल क लोग “सुरच्छा सहर” नाउँ क सहरन क चुनेन। उ सबइ सहर इ सबइ सहर रहेन:

नप्ताली क पहाड़ी प्रदेस मँ गलील क केदेस; एप्रैम क पहाड़ी प्रदेस मँ सकेम; किर्यतर्बा जउन यहूदा क पहाड़ी प्रदेस मँ रहा।

8रूबेन क प्रदेस क रेगिस्तान मँ, यरीहो क निअरे यरदन नदी क पूरब मँ बेसेर; गाद क प्रदेस मँ गिलाद मँ रमोत; मनस्से क प्रदेस मँ बासान मँ गोलान।

9कउनो इस्राएली मनई या ओनके बीच रहइवाला कउनो भी विदेसी, अगर कउनो क मार डावत ह, मुला इ संजोग क कारण होइ जात ह, तउ उ ओन सुरच्छा नगरन मँ स कउनो एक मँ सुरच्छा बरे पराइके जाइ सकत रहा। तब उ मनई हुआँ सुरच्छित होइ सकत रहा अउर पाछा करइवाला कउनो क जरिये मारा नाहीं जाइ सकत रहा। उ सहर मँ उ मनई क मोकदमा क निबटारा उ सहर क निआव क कचहरी क जरिये होइ।

याजकन अउ लेवी बंसियन क सहर

21 लेवी परिवार समूह क सासक लोग याजक एलीआजार, नून क पूत यहोसू अउ इस्राएल क दूसर परिवार समूहन क सासक लोगन स बात कियेस। 2इ कनान देसा मँ सीलो सहर मँ भवा। लेवी परिवार समूह क सासक लोग ओनसे कहेन, “यहोवा मूसा क आदेस दिहे रहा कि तू हम लोगन क रहइ बरे सहर देब्या अउर तू हम लोगन क मइदान देब्या जेहमाँ हमार जनावर चरि सकिहीँ।” 3एँह बरे उ पचे यहोवा क आदेस क माना। उ पचे लेवी परिवार समूह क इ सबइ सहर अउर ओनके गोरुअन बरे खेत दिहेन:

4पहिला पाँसा कोहात कबीला बरे जउन लेवी परिवार समूह स रहा। कछू कोहात कबिलन क एक हीँसा स तेरह सहर दीन्ह ग रहेन। इ सबइ सहर उ प्रदेस मँ रहेन जउन यहूदा, सिमोन अउ बिन्यामीन क होत रहा। इ सबइ सहर ओन कोहातियन क दीन्ह ग रहेन जउन महा याजक हारून क संतान रहिन।

5कोहात कबीला क दूसर सारे सदस्य क दस सहर दीन्ह ग रहेन। इ सबइ दस सहर एप्रैम, दान अउर मनस्से क आधा परिवार क समूहन क प्रदेसा में स रहेन।

6गोर्सीन कबीला क तेरह सहर दीन्ह ग रहेन। इ सबइ सहर उ प्रदेस में रहेन जउन इस्साकार, आसेर, नप्ताली अउर बासान में मनस्से क आधा परिवार समूह क भुईया में रहेन। 7मरारी कबीला क बारह सहर दीन्ह ग रहेन। इ सबइ सहर ओन प्रदेसन में रहेन जउन रूबेन, गाद अउर जबूलून क रहेन।

8इ तरह इस्त्राएल क लोग लेवी परिवार समूह क इ सबइ सहर अउर ओनके चारिहूँ ओर क खेत दिहन। उ पचे इ मूसा क आदेस क अनुसार यहोवा क हुकुम क मानइ बरे किहन।

9यहूदा अउर सिमोन परिवार समूहन क प्रदेस क सहरन जेका कि लेवी परिवार समूह क दीन्ह ग रहेन इ सबइ रहेन। 10इ सहरन कोहात कबीला क सदस्य क रहेन जउन कि लेवी परिवार समूह स हारून क संतानन रहेन। 11उ पचे ओनका किर्यत-अर्बा जेका नाउँ अनाक क पिता अरबा क नाउँ पाइ धरा गवा रहेन, एकर चारिहूँ कइँती क खेतन क संग दिहस। इ कसबा क यहूदा क पहाड़ी देस में हेब्रोन स भी जाना जात ह। 12मुला खेत अउर किर्यत-अर्बा सहर क चारिहूँ कइँती क छोटकन सहर यपुन्ने क पूत कालेब क रहेन।

13इ तरह उ पचे हेब्रोन सहर क हारून क संतानन क सुरच्छा क सहर क रूप में अउर लिब्ना अउर ऐंकर चारिहूँ कइँती क घास क मइदान दइ दिहस। 14उ पचे यत्तीर, एसतमो अउर ओनकर घास क मइदान, 15होलोन, दबीर, 16ऐन, युत्ता अउर बेतसेमेस भी ओनकइ चारिहूँ कइँती क घास क मइदान समेत पाएन। ऐंन दुइनउँ समूहन क यहूदा अउर सिमोन क जरिये नौ सहर दीन्ह गएन।

17उ पचे हारून क संतानन क उ सबइ सहर भी दिहन जउन बिन्यामीन परिवार समूह क रहेन। इ सबइ सहर गिबोन, गोबा अउर ओनकर घास क मइदान, 18अनातोत अउर अल्मोन रहेन। उ पचे इ सबइ चार सहर अउर ऐंनकइ चारिहूँ कइँती क सब खेत दिहन। 19इ तरह इ सबइ सहर याजकन क दीन्ह गएन। (इ सबइ याजक, याजक लोग हारून क संतान रहेन।) सब मिलाइके तेरह सहर अउर ओनकइ सब खेत ओनके जनावरन क दीन्ह गएन।

20कोहाती कबीला क दूसर लोगन क इ सहर दीन्ह गएन, जउन कि एप्रैम परिवार समूह क रहेन: 21उ पचे ओनका एप्रैम क पहाड़ी मुल्क में सेकेम सहर जउन कि सुरच्छा क सहर रहा एकर चारिहूँ कइँती क घास क मइदान क संग दिहन। उ पचे गोजरे, 22किबसैम अउर, बेथोहरोन भी ओनका दिहन। सब मिलाइके उ पचे चार सहर अउर ओनकर चारिहूँ कइँती क सारा खेत ओनका दिहन।

23दान क परिवार समूह ओनका एलतके, गिब्बतोन, 24अय्यालोन अउर गत्रिमोन दिहन। सब मिलाइके इ सबइ चार सहर अउर ओनकर सारा खेत ओनके जनावरन क बरे रहेन।

25मनस्से क आधा परिवार समूह ओनका तानाक अउर

गत्रिमोन दिहन। ओनका उ सबइ सारा खेत भी दीन्ह गएन जउन ऐंन दुइनउँ सहरन क चारिहूँ ओर रहेन।

26इ तरह इ सबइ दस जियावा सहर अउर ऐंन सहरन क चारिहूँ कइँती क भुईया ओनकर जनावरन बरे कोहाती समूह क दिन्ह गइ रही।

27लेवी परिवार समूह क गोर्सीनी कबीला क इ सबइ सहर दीन्ह ग रहेन।

मनस्से परिवार समूह क आधा परिवार ओनका बासान में गोलान दिहस। (गोलान एक सुरच्छा सहर रहा।) मनस्से ओनका बे-एसतरा भी दिहस। उ पचे इ दुइनउँ सहरन क चारिहूँ ओर क घास क मइदान भी पाएन।

28इस्साकार क परिवार समूह ओनका किस्सोन, दाबरत, 29यरमूत अउर एनगन्नीम अउर ओनकर घास क मइदान दिहस। कुल मिलाइके चार सहर।

30आसेर क परिवार समूह ओनका मिसाल, अब्दोन, 31हेल्कात अउर रहोब दिहस। एन चारिहूँ सहरन क चारिहूँ कइँती क भुईया भी ओनका ओनकर जनावरन बरे दीन्ह गइ।

32नप्ताली क परिवार समूह ओनका गलील में केदेस क सुरच्छा क सहर क रूप में दिहस। नप्ताली क परिवार समूह ओनका हम्मोतदोर अउर कर्तान भी दिहस। ओनकर घास क मइदान क संग तीन सहर।

33सब मिलाइके गोर्सीनी कबीला तेरह सहर अउर ओनकर चारिहूँ ओर क खेतन पाएस।

34दूसर लेवी कबीला मरारी कबीला रहा। मरारी लोगन क इ सहर दीन्ह ग रहेन: जबूलून क परिवार समूह ओनका योक्नाम, कर्ताह, अउर ओनकर घास क मइदान, 35दिम्ना अउर नहलाल अउर ओनकर घास क मइदान - चार सहर दिहेन।

36रूबेन क परिवार समूह ओनका यरदन क पूरब में बेसेर, यहसा, 37केदमोत अउर मेपात सहर दिहन। सारी भुईया, जउन ऐंन चारिहूँ सहरन क चारिहूँ कइँती रही, मरारी लोगन क ओनकर जनावरन बरे दीन्ह गइ।

38गाद क परिवार समूह ओनका गिलाद में सुरच्छा क सहर रामोत अउर एकर घास क मइदान दिहस। उ पचे ओनका महनैम अउर एकर घास क मइदान, 39हेस्वोन अउर याजेर भी दिहन। गाद ऐंन चारिहूँ सहरन क चारिहूँ कइँती क सारी भुईया भी ओनकर जनावरन बरे दिहन।

40सब मिलाइके मरारी कबीला जउन कि आखिरी लेवी कबीला रहा क बारह सहर दीन्ह गएन।

41सब मिलाइके लेवी परिवार समूह अइतालीस सहर अउर ओकर संग ऐंन सहरन क चारिहूँ कइँती क खेत पाएन। इ सबइ सहर उ प्रदेसन में रहेन, जउन इस्त्राएल क दूसर परिवार समूह क लोगन क कबजा में रहेन। 42हर एक सहर क साथ ओनकइ चारिहूँ कइँती क अइसी भुईया अउर खेत रहेन। जेन पइ जनावरन जिन्नगी बिताइ सकत रहेन। इहइ बात हर सहर क साथे रही।

43इ तरह यहोवा इस्त्राएल क लोगन क जउन वचन दिहे रहा, ओका पूरा किहस। उ ओनका सारा प्रदेसन दइ दिहस जेका देइ क उ ओनकर पुरखन क वचन दिहे रहा। लोग उ

प्रदेसन क लिहन अउर ओहमौं रहइ लागेन। 44अउर यहोवा ओनकर प्रदेस क चारिहुँ कइँती सान्ति स्थापित होइ दिहस काहेकि उ ओनकइ सतानन स वचन दइ रहा। ओनकर कउनो दुस्मन ओनका नाहीं हराएन। यहोवा इस्त्राएल क लोगन क हर एक दुस्मन क हरावइ दिहस। 45यहोवा इस्त्राएलियन क दीन्ह गए आपन सबहीं वचनन क पूरा किहस। कउनो अइसा वचन नाहीं रहा, जउन पूरा न भवा होइ। हर एक वचन पूरा भवा।

तीन परिवार समूह घरे लउटत हीं

22 तब यहोसू रूबेन, गाद क परिवार समूह अउ मनस्से क आधा परिवार समूह क सबहिं लोगन क एक सभा किहस। 2यहोसू ओनसे कहेस, “तू पचे यहोवा क सेवक मूसा क दीन्ह गए सबहिं हुकुमन क मान्या ह। अउर तू पचे मोरे सबहिं हुकुमन क भी मन्या ह। 3अउर इ पूरा समइ मैं तू लोग इस्त्राएल क दूसर लोगन क मदद किह्या ह। तू लोग यहोवा क ओन सबहिं हुकुमन क बहोत ही होसियार स मानइ रह्या, जेनका तोहार परमेस्सर यहोवा तू पचन्क दिहे रहा। 4तोहार परमेस्सर यहोवा इस्त्राएल क लोगन क सान्ति देइ क वचन दिहे रहा। ऐह बरे अब यहोवा आपन वचन पूरा कइ लिहस ह। इ समइ तू लोग आपन घरे लउटि सकत ह। तू लोग, आपन उ प्रदेस मैं जाइ सकत ह जउन तू पचन्क दीन्ह ग अहइ। इ प्रदेस यरदन नदी क पूरब मैं अहइ। इ उहइ प्रदेस अहइ जेका यहोवा क सेवक मूसा तू पचन्क दिहे रहा। 5मुला याद राखा कि जउन व्यवस्था मूसा तू पचन्क दिहे अहइ, ओनका माना जात रहइ। तू पचन्क आपन परमेस्सर यहोवा स पिरिम करब अउ ओकरे हुकुमन क मानइ क अहइ। तू पचन्क ओनके पाछे चलइ चाही, अउर पूरी आस्था क साथ ओनकर सेवा करा।”

6तब यहोसू ओनका आसीर्बाद दिहस अउर उ पचे बिदाइ लिहन। उ पचे आपन घरे लउटि गएन। 7मूसा आधा मनस्से परिवार समूह क बासान प्रदेस दिहे रहा। यहोसू दूसर आधा मनस्से परिवार समूह क यरदन नदी क पच्छिम मैं प्रदेस दिहस। यहोसू ओनका आपन घरे पठाएसा यहोसू ओनका आसीर्बाद दिहस। 8उ कहेस, “तू पचे बहोत सम्पन्न अहा। तोहरे पचन्क लगे चाँदी, सोना अउर दूसर बहुमूल्य जेवरन क संग बहोत स जनावर अहइँ। तू लोगन क लगे अनेक सुन्नर वस्त्र अहइँ। तू पचे आपन दुस्मनन स बहोत स चिजियन लिह्या ह। ऐन चिजियन क तू पचन्क आपुस मैं बाँट लेइ चाही। अब आपन आपन घरे जा।”

9ऐह बरे रूबेन अउ गाद क परिवार समूह अउर मनस्से क आधा परिवार समूह इस्त्राएल क दूसर लोगन स बिदाइ लिहेन। उ पचे कनान मैं सीलो मैं रहेन। उ पचे उ जगह क तजेन अउर उ पचे गिलाद क लउटेन। इ ओनकर आपन प्रदेस रहा। मूसा ओनका इ प्रदेस दिहे रहा, काहेकि यहोवा ओका अइसा करइ क आदेस दिहे रहा।

10रूबेन, गाद अउ मनस्से क अधा परिवार समूह क लोग गेलिलोथ नाउँ क जगह क जात्रा किहन। इ यरदन नदी क किनारे कनान देस मैं रहा। उ जगह पइ उ पचे एक ठु सुन्नर वेदी बनाएन। 11मुला इस्त्राएल क लोगन क दूसर

समूहन, जउन तब तलक सीलो मैं रहेन, उ वेदी क बारे मैं सुनेन जउन ऐन तीनहुँ परिवार समूह बनाए रहेन। उ पचे इ सुनेन कि इ वेदी कनान क सीमा पइ गोत्र नाउँ क जगह पइ रही। इ यरदन नदी क किनारे इस्त्राएल कइँती रही। 12इस्त्राएल क सबहिं परिवार समूह ऐन तीनउँ परिवार समूहन पइ बहोत कोहाइ गएन। उ पचे बटुर गएन अउर उ पचे ओनकइ खिलाफ जुद्ध करइ क निहचय किहन।

13ऐह बरे इस्त्राएल क मनइयन कछू लोगन क रूबेन अउर गाद क परिवार समूह अउ मनस्से क आधा परिवार समूह क लोगन स बातन करइ बरे पठाएन। इस्त्राएल क लोग प्रमुख याजक जउन कि एलीआज़र क पूत पीनहास रहा क बात पइ चर्चा करइ बरे पठाएस। 14उ पचे हुआँ क परिवार समूहन क दस नेतान क पठाएन। उ पचे सीलो मैं ठहरेन। इस्त्राएल क परिवार समूहन मैं हर एक परिवार समूह स एक मनई रहा।

15इ तरह इ सबइ गियारह मनई गिलाद गएन। उ पचे रूबेन, गाद अउ मनस्से क लोगन स बातन करइ गएन। गियारह मनइयन ओनसे कहेन: 16“इस्त्राएल क सबहिं लोग तू पचन्स पूछत हीं: तू पचे इस्त्राएल क परमेस्सर क खिलाफ इ काहे किह्या ह? तू पचे यहोवा क खिलाफ कइसे होइ गया? तू लोग आपन बरे वेदी काहे बनाया? तू पचे जानत अहा कि इ परमेस्सर क सिच्छा क खिलाफ अहइ। 17पोर नाउँ क जगह क याद करा।* हम लोग पाप क कारण अबहुँ कस्ट सहित ह। इ बड़के पाप बरे परमेस्सर इस्त्राएल क बहोत स लोगन क बुरी तरह बीमार कइ दिहे रहा अउर हम लोग अबहुँ उ बेरामी क कारण कस्ट सहत अही। 18अउर अब तू पचे उहइ करत अहा। तउ पचे यहोवा क विरुद्ध जात बाट्या। का तू पचे यहोवा क हुकुम क मानइ स मना करब्या? अगर तू पचे जउन करत अहा, बन्द नाहीं करत्या तउ यहोवा इस्त्राएल क हर मनई प कोहाइ जाइ।

19“अगर तोहार पचन्क प्रदेस उपासना बरे ठीक नाहीं अहइ तउ हमरे प्रदेस मैं आवा। यहोवा क तम्बू हमरे प्रदेसन मैं अहइ। तू पचे हमार कछू पहुँटा लइ सकत ह अउर ओहमौं बसि सकत ह। मुला यहोवा क खिलाफ जिन हवा। दूसर वेदी जिन बनावा। हम लोगन क संग पहिले स ही आपन परमेस्सर यहोवा क वेदी यहोवा क संग मलइ बरे खास तम्बू मैं अहइ।

20“जेरह क पूत आकान क सुमिरा। आकान आपन पाप क कारण मरा। उ ओन चीजन क बारे मैं हुकुम क मानइ स इन्कार किहस, जेनका नस्ट कीन्ह जाब रहा। उ एक मनई परमेस्सर क नेम क तोड़ेस, मुला इस्त्राएल क सबहिं लोगन क दण्ड मिला। आकान आपन पाप क कारण मरा। मुला बहोत स दूसर लोग भी मरेन।”

21रूबेन अउ गाद क परिवार समूह क लोग अउर मनस्से क आधा परिवार समूह क लोग इस्त्राएल क कबीला क प्रमुखन क जवाब दिहन। उ पचे इ कहेन, 22“हमार परमेस्सर यहोवा अहइ। हम लोग फुन दोहरावत अही कि

हमार परमेस्सर यहोवा अहइ* अउर परमेस्सर जानत ह कि तू लोग भी इ जाना। तू लोग ओकर फइसला कइ सकत अहा जउन हम लोग किहे अही। अगर तू लोगन क इ बिस्सास अहइ कि हम लोगा पाप किहे अही तउ तू लोग हम पचन्क अबहिं मार सकत ह। 23अगर हम पचे परमेस्सर क नेम तोड़े अही तु हम कहब कि यहोवा खुद हमका सजा देइ। का तू लोग इ सोचत अहा कि हम लोग इ वेदी क होमबलि चढ़ावइ अउर अन्नबलि अउर मेलबलि चटावइ बरे बनावा ह? 24नाहीं। हम लोग एँका इ उछेस्य स नाहीं बनावा ह। हम लोग इ वेदी काहे बनावा ह? हम पचन्क डर रहा कि भक्त्सि मँ तोहार सबन्क लोग हम पचन्क आपन रास्ट्र क एक ठु हींसा नाहीं समुझिहीं। तब तोहरे लोग इ कहिहीं, तू लोग इस्राएल क परमेस्सर यहोवा क उपासना नाहीं कइ सकत्या। 25परमेस्सर हम लोगनक यरदन नदी क दूसर कईंती प्रदेस दिहे अहइ। एकर अरथ इ भवा कि यरदन नदी क सीमा बनावा ह। हमका डर अहइ कि जब तोहरे पचन्क गदेलन बड़ा होइके इ प्रदेस पइ सासन करिहीं तब उ पचे हमका बिसरि जइहीं, कि हम भी तोहार लोग अही। उ पचे हमसे कहिहीं, 'हे रूबेन अउर गाद क परिवार समूह, तू पचे इस्राएल क हींसा नाहीं अहा!' तब तोहार संतानन हमरे संतानन क यहोवा क उपासना करइ स रोकिहीं।

26“एँह बरे हम लोग इ वेदी क बनावा। मुला हम लोग इ योजना नाहीं बनावत अही कि यह पइ होमबलि चढ़ाव अउर बलियन क देब। 27हम पचे जउने सच्चे उद्धेस्य बरे वेदी बनाए रहे, उ आपन लोगन क सिरिफ देखाव रहा कि हम पचे उ परमेस्सर क उपासना करित ह जेकर तू लोग उपासना करत अहा। इ वेदी तोहरे पचन बरे, हम लोगन बरे अउर भपिस्स मँ हम लोगन क गदेलन बरे इ बात क प्रमाण होइ कि हम लोग परमेस्सर क उपासना करित ह। हम लोग यहोवा क बलियन, अन्नबलि अउ मेलबलि चढ़ावत ह। हम पचे चाहत रहे कि तोहार गदेलन बड़ई अउर जान लेई कि हम लोग भी तोहरी तरह इस्राएल क मनई अही। 28भक्त्सि मँ अगर अइसा होत ह कि तोहार गदेलन कइई, 'हम लोग इस्राएल स सम्बंध नाहीं रखित तउ हमार गदेलन तब कहि सकिहीं कि होसियारी स धियान देई कि हमार पुरखन, जउन हम पचन स पहिले रहेन, एक ठु वेदी बनाइ रहेन। इ वेदी ठीक वइसे ही अहइ जइसी पवितर तम्बू क समन्वा यहोवा क वेदी अहइ। हम लोग इ वेदी क उपयोग बलि देइ बरे नाहीं करत। मुला इ बाने क संकेत करत ह कि हम लोग इस्राएल क एक हींसा अही।”

29“फुरे तउ इ अहइ कि हम लोग यहोवा क खिलाफ नाहीं होइ चाहित। हम लोग अब ओकर अनुसरण करब तजि देइ नाहीं चाहित। हम लोग जानत अही कि एक मात्र सच्ची वेदी उहइ अहइ जउन पवितर तम्बू क समन्वा अहइ। उ वेदी, हमरे परमेस्सर यहोवा क अहइ।”

30याजक पीनहास अउर दस नेतन रूबेन अउर गाद क परिवार समूह अउ मनस्से क आधा परिवार समूह क लोगन

क कही गइ बात सुनेन। उ पचे ओनकइ बात स संतुट्ट रहेन। 31एँह बरे एलीआजार क पूत याजक पीनहास कहेस, “अब हम लोग समुझत अही कि यहोवा हमरे संग अहइ अउर हम लोग जानत अही कि तू पचन मँ स कउनो भी ओकरे खिलाफ नाहीं गवा अहा। हम लोग खुस अही कि इस्राएल क लोगन क यहोवा स सजा नाहीं मिली।”

32तब पीनहास अउ नेतन उ जगह क तजेन अउर उ पचे आपन घरे चला गएन। उ पचे रूबेन अउर गाद क लोगन क गिलाद प्रदेस मँ तजेन अउर कनान क लउटि गएन। उ पचे लउटिके इस्राएल क लोगन क लगे गएन अउर जउन कछू भवा रहा, ओनसे कहेस। 33इस्राएल क लोग भी सन्तुट्ट होइ गएन। उ पचे खुस रहेन अउर उ पचे परमेस्सर क धन्यवाद दिहन। उ पचे निर्णय लिहन कि उ पचे रूबेन, गाद अउ मनस्से क आधा परिवार समूह क लोगन क खिलाफ जाइके नाहीं लइहीं। उ पचे ओन प्रदेसन क नस्ट न करइ क निर्णय किहन।

34अउर रूबेन अउर गाद क लोग कहेन, “इ वेदी सबहिं मनइयन क इ बतावत ह कि हम पचन्क इ बिस्सास बाटइ कि यहोवा परमेस्सर अहइ अउर एँह बरे उ पचे वेदी क नाँउ 'प्रमाण' धरेन।”

यहोसू लोगन क उत्साह बढ़ावत ह

23 यहोवा इस्राएल क ओकरे चारिहुँ कईंती क ओनके दुस्मन स सान्ति प्रदान किहस। यहोवा इस्राएल क सुरच्छित बनाएस। बरिस बीत गएन अउर यहोसू बहोत बूढ़ा होइ गवा। 2इ समइ यहोसू इस्राएलियन अउर ओनका बुजुर्गन, नेतन, निआवधीसन अउर फउज क अफसरन क बइठक बोलाएस। यहोसू ओन लोगन स कहेस, “मई बहोत बूढ़ा होइ गवा अहउँ। 3तू पचे उ लख्या जउन यहोवा हमरे दुस्मनन क संग किहस। उ इ हमरी मदद बरे किहस। तोहार पचन्क परमेस्सर यहोवा तोहरे सबन बरे जुद्ध किहस। 4लखा, मई ओन रास्ट्रन क सबहीं भुईया क बाँट दिहस ह जेका इस्राएल क परिवार समूह स निकाला नाहीं गएस। इ भुईया यरदन नदी अउ पच्छिम क भुमध्य समुदर क बीच अहइ, अउर ओन रास्ट्रन क सामिल कइ लिहस जेका मई हरइ रहा। 5उ तोहार पचन्क परमेस्सर यहोवा लोगन क उ जगह क तजि देइ बरे मजबूर करी। जइस ही पचे उ प्रदेस मँ घुसब्या यहोवा ओन लोगन क उ प्रदेस तजइ बरे मजबूर करी। तोहार परमेस्सर यहोवा तू पचन्क इ वचन दिहस ह।

6“तू पचन्क ओन सबइ हुकुमन क मानइ मँ सावधान रहइ चाही जउन यहोवा हमका दिहे अहइ। उ हर नियमन अउर विधियन क पालन करा जउन मूसा क व्यवस्था क किताबे मँ लिखा अहइ। उ व्यवस्था क खिलाफ जिन जा। 7इ करा ताकि गैर इस्राएली लोग जउन कि तोहका आपन दोस्त बनाइ बरे नाही ललचाइ। ओनकइ देवतन क पूजा नाही करा अउर ना ही ओकर देवतन क नाउँ ल्या। किरिया खाइ बरे ओन देवतन क नाउँ क प्रयोग जिन करा। अउर ओन देवतन क पूजा अउ सेवा जिन करा। 8तू पचन्क सदा आपन परमेस्सर यहोवा क अनुसरण करइ चाही। तू पचे इ

हमार ... परमेस्सर यहोवा अहइ या “यहोवा फुरइ परमेस्सर अहइ! यहोवा फुरइ परमेस्सर अहइ!” सब्द क अरथ “अल इलाहिम यहोवा, अल इलाहिम यहोवा।”

बीते जमाने में किह्या ह अउर तू पचन्क इ करत रहइ चाही।

9“यहोवा अनेक सक्तीवाला रास्ट्रन क हरावइ में तोहार मदद किहेस ह। यहोवा ओन लोगन क आपन देस तजइ बरे मजबूर किहस ह। कउनो भी रास्ट्र तू पचन्क हरावइ में समरथ नहीं होइ सका। 10यहोवा क मदद स इस्त्राएल क एक मनई एक हजार मनइयन क हराइ सकत ह। ऐंकर कारण इ अहइ कि तोहार परमेस्सर यहोवा तोहरे बरे जुद्ध करत ह। यहोवा इ करइ क वचन दिहेस ह। 11ऐह बरे तू पचन्क आपन परमेस्सर यहोवा क भक्ति करत रहइ चाही। आपन पूरी आत्मा स ओहसे पिरेम करा।

12“यहोवा क रस्ता स कबहुँ दूर जिन जा। ओन दूसर लोगन स दोस्ती न करा जउन अबहिँ तलक तोहरे पचन्क बीच तउ अहइँ मुला जउन इस्त्राएल क अंग नहीं अहइँ। ओनमाँ स कउनो क संग बियाह जिन करा। मुला अगर तू पचे ऐंन लोगन क मीत बनब्या, 13तब तोहार परमेस्सर यहोवा तोहरे दुस्मनन क हरावइ में तोहार मदद नहीं करी। इ तरह इ सबइ लोग तोहरे बरे एक जाल बन जइहीं। मुला उ पचे तोहरे पचन्क पिठिआ बरे कोइन अउ तोहरी सबन्क आँखिन बरे काँटा बन जइहीं। उ पचे पलट जइहीं अउर नफरत करिहीं जब तलक कि तू पचे इ नीक भुईया स बिदा न होइ जाब्या जेका तोहार परमेस्सर यहोवा तू पचन्क दिहे बाटइ। मुला अगर तू पचे इ हुकुम क नहीं मनब्या तउ तू पचे नीक भुईया क खोइ देब्या। 14इ करीब-करीब मोरे मरइ क समइ बा। तू पचे जानत अहा अउर फुरइ बिस्सास करत अहा कि यहोवा तोहरे पचन्क बरे बहोतइ बड़के काम किहेस ह। तू सबइ जानत अहा कि उ आपन दीन्ह भए वचनन में स कउनो क पूरा करइ में असफल नहीं रहा अहइ। यहोवा ओन सबहिँ वचनन क पूरा किहेस ह, जउन उ हमका दिहस ह। 15जे तरह उ सबहिँ आसीर्बादि जउन तोहार परमेस्सर यहोवा दिहस ह, पूरी तरह सच भएन, उहइ तरह सबहिँ विपत्तियन क घटइ क यहोवा कारण होब्या, जब तलक कि उ तोहका इ नीक भुईया क स जउन यहोवा तोहार परमेस्सर तोहका दिहस ह नास नहीं कइ देइ। 16इ घटि जाइ, अगर तू पचे आपन परमेस्सर यहोवा क संग कीन्ह गइ समझौता क मानइ स इंकार करब्या। अगर तू पचे दूसर देवतन क लगे जाब्या अउर ओकर आराधना करब्या तउ तू पचे इ भुईया क खोइ देब्या। अगर तू पचे अइसा करब्या तउ यहोवा तू पचन पइ बहोत गुस्साइ जाइ। तब तू पचे इ धरती स हाली गायब होइ जाब्या जेका उ तू पचन्क दिहस ह।”

यहोसू अलविब कहत ह

24 तब इस्त्राएल क सबहिँ परिवार समूह सकेम में बटुर गएन। यहोसू ओन सबहिँ क हुआँ एक संग बोलाएस। तब यहोसू इस्त्राएल क बुजुर्गन, ओनकइ नेतन, ओनकइ निआवधीसन अउर ओनकइ फउज क अफसरन क बोलाएस। इ सबइ मनई परमेस्सर क समन्वा खड़ा भएन।

2तब यहोसू सबहिँ लोगन स बात किहस। उ कहेस, “मई उ कहत हउँ जउन यहोवा, इस्त्राएल क परमेस्सर तू पचन्स कहत अहइ:

बहोत समइ पहिले तोहरे पचन्क पुरखन परात नदी क दुसरी कईती रहत रहेन। मई ओन मनइयन क बारे में बात करत अहउँ, जउन इब्राहीम अउर नाहोर क पिता तेरह क तरह रहेन। ओन दिनन तोहार पचन्क पुरखन दूसर देवतन क पूजा करत रहेन। 3मुला मई, यहोवा तोहरे पचन्क पुरखन इब्राहीम क नदी क दूसर कईती क भुईया स बाहेर लिआएउँ। मई ओका कनान क भुईया स होइके लइ गएउँ अउर ओका अनेक सन्तानन दीन्ह। मई इब्राहीम क इसहाक नाउँ क पूत दिहेउँ। 4मई इसहाक क याकूब अउर एसाव नाउँ क दुइ पूत दिहेउँ। मई सार्इर पहाड़े क चारिहुँ कईती क प्रदेश एसाव क दिहेउँ। मुला याकूब अउर ओकर सन्तानन हुआँ नहीं रहिन। मिस्त्र चले गएन।

5तब मई मूसा अउ हारून क मिस्त्र पठएउँ। मई मिस्त्र क लोगन पइ भयंकर विपत्तियन पइइ दिहेउँ। तब मई तू सबइ पचन्क मिस्त्र स बाहेर लिआएउँ। 6इ तरह मई तोहरे पचन्क पुरखन क मिस्त्र स बाहेर लिआएउँ। उ पचे लाल सागर तलक आएन अउर मिस्त्र क लोग ओनकर पाछा करत रहेन। ओनके संग रथ अउ घुड़सवार रहेन। 7ऐह बरे मनइयन मोसे यानी यहोवा स मदद माँगेन अउर मई मिस्त्र क लोगन पइ बहोत बड़की विपत्ति आवइ दीन्ह। मई यानी यहोवा समुद्दर में ओनका बोर दिहेउँ। तू लोग खुद ही लख्या कि मई मिस्त्र क फउज क संग का किहेउँ। ओकरे पाछे तू पचे रेगिस्तान में लम्बे समइ तलक रह्या। 8तबइ मई तू पचन्क एमोरी लोगन क धरती में लिआएउँ। इ यरदन नदी क पूरब में रहा। उ सबइ लोग तोहरे पचन्क खिलाफ लड़ेन, मुला मई तू पचन्क ओनका हरावइ दिहेउँ। मई तू पचन्क ओन लोगन्क नस्ट करइ बरे सकती दिहेउँ। तब तू पचे उ धरती पइ अधिकार किह्या।

9तब सिप्पोर क पूत मोआब क राजा बालाक इस्त्राएल क लोगन क खिलाफ लड़इ क तइयारी किहस। राजा बोर क पूत बिलाम क बोलाएस। उ बिलाम स तू पचन क सराप देइ क कहेस। 10मुला मई यहोवा बिलाम क एक न सुनेउँ। ऐह बरे बिलाम आपन चाहत क खिलाफ तू लोगन बरे नीक चीज होइ क याचना किहस। उ तू पचन्क खुले मन स आसीर्बाद दिहस। इ तरह मई तू पचन्क बिलाम स बचाएउँ।

11तब तू पचे यरदन नदी क पार तलक जात्रा किह्या। तू लोग यरीहो प्रदेश में आया। यरीहो सहर में बसइयन तोहर पचन्क खिलाफ लड़ेन। एमोरी, परिज्जी, कनानी, हिल्ली, गिर्गसी, हिक्वी अउर यबूमी लोग भी तोहरे पचन्क खिलाफ लड़ेन। मुला मई तू पचन्क ओन सबका हरावइ दिहेउँ। 12जब तोहार पचन्क फउज अगवा बड़ी तउ तोहार दुस्मन पराइ गएन जइसे मई ओनका अउर अमोरी राजा क खिलाफ भोंड़ा पठाइ रहा। ऐह बरे तू लोग आपन धनुस या तरवार क प्रयोग किए बिना ही ओन पइ कब्जा कइ लिहा।

13इ मई, ही रहेउँ, जउन तू पचन्क उ धरती दिहेउँ। मई तू पचन्क उ धरती दिहेउँ जहाँ तू पचन्क कउनो काम नहीं करइ क पड़ा। मई तू पचन्क सहर दिहेउँ जेनका तू पचन्क बनाउब नहीं भवा। अब तू पचे उ धरती अउर ओन सहरन मँ रहत अहा। तोहरे सबन्क लगे अंगूरे क लता अउ जइतून क बाग अहई, मुला ओन बागन क तू पचे नहीं लगाया।”

14तब यहोसू लोगन स कहेस, “अब तू लोग यहोवा क कहब सुनि लिह्या ह। एँह बरे तू पचन्क यहोवा क सम्मान करइ चाही अउ ओकर सच्ची सेवा करइ चाही। ओन लबार देवतन क बहाइ द्या जेनका तोहार पचन क पुरखन पूजत रहेन। इ सब कछू बहोत समइ क पहिले फरात नदी क दूसर कईती, मिस्त्र मँ भी भवा रहा। अब तू पचन्क यहोवा क सेवा करइ चाही।

15“मुला होइ सकत ह कि तू पचे यहोवा क उपासना नहीं करइ चहत्या। तू पचन्क खुद आज ही इ चुन लेइ चाही। तू पचन्क आजु तय कइ लेइ चाही कि तू पचे केकर उपासना करब्या। तू पचे ओन देवतन क उपासना करब्या जेनकर उपासना तोहरे पचन्क पुरखन उ समइ करत रहेन जब उ पचे नदी क दूसर कईती रहत रहेन? या तू पचे ओन एमोरी लोगन क देवतन क उपासना करइ चाहत अहा जउन हिआँ रहत रहेन? जहाँ तलक मोरी अउ मोरे परिवार क बात अहइ, हम यहोवा क उपासना करब।”

16तब मनइयन जवाब दिहन, “नाहीं, हम यहोवा क अनुसरण करब कबहुँ न तजब। नाहीं, हम लोग कबहुँ दूसर देवतन क सेवा नहीं करब। 17हम जानित ह कि उ परमेस्सर यहोवा रहा जउन हमरे लोगन क मिस्त्र स लिआवा। हम लोग उ देस मँ दास रहे। मुला यहोवा हम लोगन बरे हुआँ बड़कन-बड़कन काम किहस। उ उ देस स हम लोगन क बाहेर लिआवा अउर उ समइ तलक हमार रच्छा करत रहा जब तलक हम लोग दूसर देसन स होइके जात्रा कीन्ह। 18तब यहोवा ओन एमोरी लोगन क हरावइ मँ हमार मदद किहस जउन उ प्रदेश मँ रहत रहेन जेहमँ अज हम पचे रहित ह। एँह बरे हम लोग यहोवा क सेवा करतइ रहब। काहेकि उ हमार परमेस्सर अहइ।”

19तब यहोसू कहेस, “तू पचे यहोवा क काफी सेवा अच्छी तरह स नहीं कइ सकब्या। यहोवा, पवितर परमेस्सर अहइ अउर परमेस्सर आपन लोगन क जरिये दूसर देवतन क पूजा स घिना करत ह। अगर तू पचे उ तरह परमेस्सर क खिलाफ जाब्या तउ परमेस्सर तू पचन्क छिमा नहीं करी। 20तू पचे यहोवा क तजि देब्या अउर दूसर देवतन क सेवा करब्या तब यहोवा तू पचन पइ भयंकर विपत्तियन क लिआइ। यहोवा तू पचन्क बरबाद करी। यहोवा तोहरे पचन्क बरे अच्छा रहा ह, मुला अगर तू पचे ओकरे विरुद्ध चलत अहा तउ उ तू पचन्क नास कइ देइ।”

21मुला मनइयन यहोसू स कहेन, “नाहीं। हम पचे यहोवा क सेवा करब।”

22तब यहोसू कहेस, “खुद आपन अउर आपन संग क लोगन क चारिहुँ कईती निहारा। का तू पचे जानत अहा

अउर अंगीकार करत अहा कि तू पचे यहोवा क सेवा करब चुन्या ह? का तू सब एकर गवाह अहा?”

मनइयन जवाब दिहन, “हाँ, इ फुरइ अहइ। हम लोग धियान रखब कि हम लोग यहोवा क सेवा करब चुना ह।”

23तब यहोसू कहेस, “एँह बरे आपन बीच मँ जउन बीच मँ जउन लबार देवतन रखत अहा ओनक जरइ द्या। आपन पूरा हिरदइ स इस्राएल क परमेस्सर यहोवा स पिरेम करा।”

24तब मनइयन यहोसू स कहेन, “हम लोग यहोवा, आपन परमेस्सर क सेवा करब। हम लोग ओकर आग्या क पालन करब।”

25एँह बरे यहोसू लोगन बरे उ दिन एक वाचा किहस। यहोसू इ वाचा क ओन लोगन क जरिये मानइ बरे एक ठु नेम बनाइ दिहस। इ सकेम नाउँ क सहर मँ भवा। 26यहोसू इ सबइ बातन क परमेस्सर क व्यवस्था क किताबे मँ लिखेस। तब यहोसू एक ठु बड़की सिला लिआवा। इ सिला इ करारा क प्रमाग रही। उ इ सिला क यहोवा क पवितर तम्बू क निअरे बलूत बृच्छ क खाले धरेस।

27तब यहोसू सबहिँ लोगन स कहेस, “इ सिला तू पचन्क ओका याद दिआवइ मँ सहायक होइ जउन कछू हम पचे आजु कहे अही। इ सिला तब हिआँ रही जब परमेस्सर हम लोगन स बतियात रहा। एँह बरे इ सिला कछू अइसी रही जउन तू पचन्क याद दिआवइ मँ मदद करी कि आजु क दिन का भवा रहा। इ सिला तोहरे बरे एक गवाह बनी रही। इ तू पचन्क तोहर परमेस्सर यहोवा क खिलाफ जाइ स रोकी।”

28तब यहोसू लोगन स आपन घरे लउटि जाइ क कहेस तउ तउ हर एक मनई आपन प्रदेश क लउटि गवा।

यहोसू क मउत

29ओकरे पाछे नून क पूत यहोसू मर गवा। उ एक सौ दस बरिस क रहा। 30यहोसू आपन भुइँया तिम्नत्सेरह मँ दफनावा गवा इ रास पहाड़ क उत्तर मँ एप्रैम क पहाड़ी प्रदेश मँ रहा। 31इस्राएल क लोगन यहोसू क जिन्नगी क समइ मँ यहोवा क उपासना किहन अउर यहोसू क मरइ क पाछे भी, लोग यहोवा क उपासना करत रहेन। इस्राएल क लोग तब भी यहोवा क उपासना करत रहेन जब तलक सबहिँ बुजुर्गन जउन कि यहोसू क पाछे जिअत रहेन। इ सबइ उ सब नेता रहेन, जउन उ पचे उ सब कछू लखे रहेन जउन यहोवा इस्राएल बरे किहे रहा।

यूसुफ दफनावा गवा

32जब इस्राएल क लोगन मिस्त्र तजि दिहेन तब उ पचे यूसुफ क तने क हाइ आपन संग लइ आपन रहेन। एँह बरे लोग यूसुफ क हाइ सकेम मँ दफनाएन। उ पचे हाइन क उ भुइँया मँ दफनाएन जेका याकूब सकेम क बाप हमोर क पूतन स बेसहे रहा। याकूब उ भुइँया क चाँदी क सौ सिक्कन स बेसहे रहा। इ प्रदेश यूसुफ क सन्तानन क रहा।

33हारून क पूत एलीआजार मर गवा। उ गिबा मँ दफनावा गवा। गिबा एप्रैम क पहाड़ी प्रदेश मँ एक ठु सहर रहा। उ सहर एलीआजार क पूत पीनहास क दीन्ह गवा रहा।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>